

+H

corpus: ReF.RUB.ext

language-area: hessisch

language-region: westmitteldeutsch

language-type: mitteldeutsch

genre: P

medium: Druck

time: 15,2

reference: Seite, Zeile

corpus-sigle: F206, III-Cc-P2, D

text: Breydenbach: die heyligen reyßen gen Jherusalem

text-author: Bernhard von Breidenbach

text-type: CB Reisebericht

assignment_quality: Z2

hoffmann_wetter_nr: HW126

library: Bayerische Staats Bibliothek

library-shelfmark: 2 Inc.c.a. 1727

date: 1486

place: Mainz

text-place: -

printer: Erhard Reuwich

edition: Mozer, Isolde (Hrsg.): Bernhard von Breydenbach. Peregrinatio in terram sanctam. Frühneuhochdeutscher Text und Übersetzung. Berlin, New York 2010. (IB-Signatur: V Ber 152)

size: -

language: fnhd

literature: -

notes-transcription: Satzmajuskeln sind rubriziert.; Schmuckinitialen sind rot oder blau rubriziert.; Alineae sind rot oder blau rubriziert.; Überschriften sind rot unterstrichen.; im Digitalisat des Drucks ist 48r doppelt vorhanden (pdf: 98/99), ebenso 48v (100/101)

abbr_ddd: Breijer

extent: FnhdC: -; compl: 033r,01 (68)-047r,11(96), Ergänzung: bis 051v,23 (107); Ergänzung: ab 113r,01 (230), 117r,10 (238)-125v,02 (255); 172v,01 (349)-176r,34 (364)

extent-size: FnhdC: -; compl: 25.307 (davon 498 bisher als fremdsprachlich markiert)

@H

F206-033r,01 // Von der jnsel Creta oder Candia genant . UOn modon ist dryhundert welscher mylen biß gen Candia . eyn jnsel also genant . oder auch Creta . welche jnsel gantz ist vnder der herschafft der venediger . Sye pflegen auch allzyt eyne hertzog da haben eyne vß ynen darzuo erwelet . Welchen sye auch nach ergangener zyt enderen . als sye gewonlichen in sollichen ampten thuon yn allen yren landen . Disse jnsel Candia ligt ynn grecia zwuschen der sonnen vffgang vnd nydergang gar ein wytten zuog oder weg vß gestreckt . dan nach sage der poeten lyget sie yn mittel der welt . die in dry teyl vß geteylet ist . eyne mittelwesen der selbigen dry teyle . das ist Asye Affrice vnd Europe . also daz sye hatt gegen mitternacht das mer Egeum genant . vnd von nydergang der sonnen die mer jonyun vnd mirtheum geheysen alle in Europa gehoreen . Gegen vffgang der sonnen hatt sye die mere ycarium Carpatium vnd Allexandrinum die zuo Asya gehoreen . Gegen mittentag hatt sie die mere libicum vnd adriaticum . zuo Affrica gehoreig . Vß disser vrsach satzten die poeten eyne groß bild eyne alten mans vff den hoechsten berg diser jnsel . yda genant . Deßsel

F206-033r,02 ben bildes haubt was guldyn . die brust vnd arm sylberyn . der lyp vnd die lenden erin . die beyne yßin . die füße von gebacken erde . Zuo dissem bild oder sulen hetten die land Asya Affrica vnd europa eyne anblick . Dises bild hett kleyne speltyn oder lochlyn . vß welchen syn zehern flossen . vnd dieselbigen versamelet zuoeynander fließen mit vngestymikeyt durch die erdehuolen in die heller . vnd machen das groß wasser vnd fluß acharon

F206-033r,03 tis . Diser fabel gedencket dick sant jeronimus in syn geschriffen . // Diß jnsel ist so vol alles wollustes daz sye wart geheysen vor zyten die erde vnd das land der gotter die auch in dißer jnsel haben gewonet . darvon die poeten gar vil sagen . daz ich vmb kuortz willen hie vermid . // Jtem diße jnsel ist vor zyten mit hundert edelen stetten gezyeret ge

F206-033r,04 wesen . demnach sie Centapolis(das ist hundertstettick) ward genant // Jtem diße jnsel hatt zum ersten erfunden auch gebruchet bogen vnd geschutz . wappen vnd gwer . ruoder vnd schiffgezug . // Jtem sie hatt zum ersten die buochstaben gefunden oder geschriff . ge

F206-033r,05 lert zum ersten reyßigen gezug zuo ordnen in krieg . Auch die kunst des gesangs vff seyten spylen vnd sunst . ist zum ersten vß yr komen vnd yn yr geübet worden . // Jtem diß jnsel hatt gar vil vyheß schaff vnd geyß

vnd derglichen . aber wenig gewild . wolff vnd fusch vnd sollich schedlich thier hatt sye vberall nit . keyn schlang vnd keyn gifftiger wuorm wechset daryn oder ob er vßwendig daryn wurd gebracht so stürbet er von stund an . Doch ist war das ettlich gifftig spynnen daryn werden gefunden . Auch ist das vbel daryn daz frawenbyss oder mit negeln rissz ist in der jnnsel gar gifftig schedlich vnd todtlich . also daz wan eyn frauwe in der jnsel eyn man bysset . oder mit den negeln kratzt . so müß der man von stund an sterben . als ob er von den aller gifftigste wuorm wer verletzt worden . // Jtem diß kongrich Cretense genant ist das aller altest . hatt auch dick stritt geforet wider die die man gotter nennet . als jupiter was vnd Sa

F206-033r,06 turnns vnd ander . // Jn disser jnsel hatt gewonet Epygenides der poeth . des sant Pau
F206-033r,07 lus meldung thuot schribend zuo Thytum am ersten capitell . welcher poeth von ynnwonern disser jnnsel saget daz sye luogenhaftig weren ful vnd treg 7c . // Jtem yn diser jnsel hatt zum ersten sant Andreas geprediget ee dan er in Achayam zuog . Nach ym sant Paulus . der auch syn junger Thy

F206-033r,08 tum da ordnet zuo eym bischoff . welcher auch in disser jnsel rastet . // Disse groß jnsel hatt ob vierhundert welscher mylen vmb sich . vnd ist auch da eyn ertzibstum . vnd liget dryhundert welsch mylen von Ro

F206-033r,09 dyß . davon hyenach wurt gesaget . UOn modon fuoren wir vß vff sonntag zuo abent mit eynem kley

F206-033r,10 nen wynde . vnnd vmb vier ver deß montags hernach was der xvj . tag junij . nach mittag kam vns eyn naue oder schiff von Damasco den venedigern zuohoreig vnd fragten vns von venedig . vnd von dem hertzog von ferrar . vnd von den hertzog von Lotryngen nuwe mer . Vnd fuorent den selbigen montag byß vmb acht vre hundert my

F206-033r,11 len . vnd die zwen tag dar nach mit kleynem wynd . Aber den dritten dar

F206-033r,12 nach mit starckem wynd . was donerstag der . xix . tag junij biß gen ro

F206-033r,13 dyß . Also daz wir by hohem tag zuo Rodyß komen in die porten . vnnd muosten doch die selbig nacht daryn verharren . dan dem hohen meister zuo rodiß ward gleublichen gesagt eß sturbe yn vnser galeen . Deßhalb wir vff gehalten worden byß vff fryttag zuo morgen . da kam vns das geleyt daz wir an landt tratten . vnd verhartten da biß vff den sonntag . was der zehentusent merterer tag . // Von dem heyltum zuo Rodyß . DJewel wir dar waren wyset man vns das heyltum jm schloß . vnd sant johans kyrchen . mit namen eyn eren crutz das vß den becke darvß Cristus synen jungeren die füß gewaschen hatt ge

F206-033r,14 machet ist . Vnd man sagt wan man das selbig crütz in wachs drucket . so soll eß helfen vff dem meer fur vngestymikeyt . // Jtem zuo Rodiß syn zwen der dorn von der kron jhesu cristi . vnd ist der eyn jm schloß wol verslossen . davon saget man daz er allweg am karfrytag bluowe . eß ist auch do der pfennig eyner darvmb Cristus der herre verkaufft ist worden . // Jtem das haubt der heyligen jungfrauwen Phylomene . // Jtem eyn groß stuock von dem heyligen crütz . // Jtem eyn arm von sant Blasio . // jtem eyn arm sancti Stephani deß ersten martererß . // jtem eyn arm sancti johannis des teufferß . // jtem eyn arm sancti Georgij deß martererß . // jtem eyn arm sancti Thome deß aposteln . // jtem eyn arm sant leodegarij . // jtem das haubt sancte Eufemie der jungfrauwen . // jtem eyn haubt von den eylff tusent jungfrauwen . // jtem das haubt sancti Policarpi . // jtem eyn handt sancte Clare der iungfrauwen . // jtem eyn handt sancte Anne der muoter der iungfrauwen marie . // jtem man wyset auch zuo Rodyß an sant Katherinen tag yn deß grossen meisters capellen den lyncken arm vnd eyn handt von sant Katherinen lychnam . RODYß ist eyn statt mit starcken muren vnd vesten tuornen erbuwen vnd mit andern bollwercken wolbewaret . vnd syn vor disser statt an dem meer . xiiij . turn mit wyntmuolen . von den januesern vor zyten gemacht zuo eynem zeychen . anstat auch eyner straff vmbwegen daz sye wolten disse statt heymlichen ynn genomen haben daz doch vnderstanden ward . vnd ettlich von ynen yn der selbigen that ergriffen vmb kamen . Die andern zuo nutz disser statt gezwungen . diß ob genant wyndtmuolen zuo eyner ewigen gedechtnuß solliches vnbillichen handels zuo buwen . // Jtem man leset auch daz Troya vß Rodiß anfenglichen zerstoret ist worden vß der vrsach . dan man saget daselbet wesen eyn guldin fell 7c . davon die troyansche historia wytter saget . daz ich vmb kurtze we

F206-033r,15 gen ytz verswig . // Jtem diße jnsel Rodyß ist ser bergetrich von gewyld . vnd lustig von talhen . vnd alle die die vber meer sollen von wannen sye komen müssen hye zuo lenden . // Jtem Rodiß ist vnder den ynselen Ciclades genant die erst gegen orient . Welches doch baß zuo verstan ist zuo mercken . daz vier vnd funff

F206-033r,16 tzig ynsel ligen zwuoschen dem mer Egeum vnd maleum vmbgebende mit dem yndischen meer . sich streckende von mitternacht gegen mittem

F206-033r,17 tag . habende funffzig tusent schritt von mitternacht gegen mittemtag vnd funffzig tusent von orient gegen occident . all vmbbligend die mit

F206-033r,18 telynsel Delo genant . vnder welchen wie ob gesagt ist Rodyß die erst ist gegen orient . Thenedos die erst gegen mitternacht . Carpathos die erst gegen mittemtag . Cytherea die erst gegen occident . alles ynsel also genant vß den vier vnd funffzigen ynselen ciclades geheysen . // Jtem yn diser ynsel ist vor zyten gewesen eyn groß bild oder abgott der sonnen . vß ertz gossen . subitzig schü lang . funffzehen schü hoher dan der groß colloß der zuo Rom stund in Colyseo . Vnd ward diß bild ge

F206-033r,19 rechnet fur eyns vnder den suoben wunderen der welt . vnd stun im mer behuottende den rodyßer port . vnd hett die beyn wyth voneynander vß gestreckt . also daz keyn schiff groß oder kleyn mocht yn den port komen anders dan zwuoschen den beynen disses Coloß oder bild . Syn fynger waren grosser dan groß suollen steynin oder holtzin . Vnd do vor zyten eyn Soldan von egipten disse ynsel hett vberfallen vnd gewunen . lud er vil schiff vol

von matery das ist ertz disser sullen die er zerbrach . vnd furet eß mit ym in syriam . da lud er es vsz den schiffen von diser matery vff nün hundert Camelthyer . vnd sendet es gen Allexandrian // Von dissem Colosz ward das selbig land genant Colosensium . zuo denen sant Paulus schribet eyn epistel . Wie aber diße jnsel sy komen yn gewalt vnd hant der johaniten(das ist der bruoder deß spitals ettwan sant johans zuo jherusalem) were vill von zuo sagen . wan sye wol vier gantzer jar disse statt vnd jnsel beleger

F206-033r,20 ten vnd bestritten . vnd zuoletzst nach vil arbeyt mit gewalt erfolgten . mit hilff auch ettlicher burgeren die ynen gundetten vnd zuo huldetten . Also habent sie ytz do selbet die oberste haubtstatt oder sitz yrs ordens do auch yr oberster meister wonet . // Jtem von disser jnsel fert man auch ordenglichen gen Candia oder Creta zuo der jnsel . von der ob geschriben ist . vnd verlaßet die vier vnd funffzig ynselen Ciclades geheysen . Also daz die schyff nit komen in den kreyß oder daz mittel der selbigen jnselen . sye werden dan mit ge

F206-033r,21 walt durch starcken windt do hyn yn getrieben . // Jtem diße jnsel vnd statt Rodiß ist also nahe den durcken daz kume eyn myle zwuschen yn ist . vnd nit mee dan eyn kleyner arm des meres diß scheydet von denen darvmb auch die durcken disse statt dick haben geleydiget . vnd besunder in kurtz vergangener zyt . als yn dem jar da man zalt von crist geburt . M . cccc . lxxix . davon an end disses buochlyns wytter stett geschriben . Eß hatt auch disse statt vnlang nach der selbi

F206-033r,22 gen zyt mercklichen schaden empfangen durch grossen erdtbyddemmen so syther da ist geschehen . // Jtem disse herschafft vnd jnsel hatt gar vil vnd fruchtbar land . jn

F206-033r,23 sel . vnd floß vmb sich lygen yr zuogehoreig . besunder eyn gar werlich vnd vest sloß in dem meer ligend zuo sant Peter genant gegen der turcky . dar

F206-033r,24 vß dem turcken vil schaden geschicht . vnd vil daselbet der cristen vß der turcky enttrynnen vnd kommen durch gehilff der johaniten wydervmb in cristen land . Vß dem selbigen sloß wurd eyn sunderlich bruch mitt hunden gehandelt der kum glaublich vnd doch war ist . welche hunde vß gesandt vff die strassen in die turcky durch gelutt eyner glocken zuo essenzyt widervmb heym beruofft werden . vnd dan wider vß lauffen vnd die turcken wo sie sye vinden zerryssen Als das wol gehort wurt von den Rodyßern herren so sie her vß kommen zuo land . Am . xxij . tag des moneds junij . fuoren wir vß Rodyß vnsern weg . mit eynem starcken wynt durch den golff sancte helene genant . ist gar eyn sorglich far vff dem mer . do was eyn sol

F206-033r,25 liche vngestymikeyt des meres vnd der fluß . daz vnser vil vor grosser sorg vnd angst krank wuorden also grussamgliche thett das mer den ersten tag vnser vszfart von Rodisz . Aber den andern tag het

F206-033r,26 ten wir besser wynt vnd fuoren mit dryen vff gethonen segelen . also daz wir an sant johans des teuffers tag vnd fest . dem kongrich vnd ynsel Cypri vns naheten . // Vff dissem weg fuoren wir fur ettlich stett . derren eyn Baffa heysset vor zyten eyn grosse vnd mechtige statt gewesen . aber ytz gantz zerstort . da blieben wir an sant johans tag . wiewol gar bosser lufft daselbig ist als auch in der gantzen ynsel Cypri . // Jn der ytz genanten statt Baffa sycht man noch fußstapffen vil al

F206-033r,27 tes gebüwes . vnd besunder gar herlich kyrchen die ettwan da syn gewe

F206-033r,28 sen . auch gar starcker thuorn vff eynem berg in mitten der statt ettwan gestanden . // Doselbet vnder eyner kyrchen die ettwan der myner bruo

F206-033r,29 der was . ist eyn grosser kercker mit suoben vnderschedung oder holen da sant Paulus ettwan lang in gefengnüß ist gelegen da er daselbet mit

F206-033r,30 sampt sancto Barnaba prediget cristenlichen glaüben . // Jtem daselbet vnder eyner anderen kyrchen ist eyn bruon suß vnd guot wasserquellen . welches wasser wider den frorer gar heilsam ist . darvmb man eß in wytte land fuorer noch teglich . // Jtem daselbet werden auch bewyßen suoben kleyne kameran oder cel

F206-033r,31 len vnder der erden . in welchen suobenschleffer . nit die die zuo Rom in den berg Celeo . sunder ander vil zyt syn gelegen . Von der vor genauten statt Baffa kamen wir in eyn ander stat genant Piscopia . welche statt ein konig von engellant vmb wegen syner swester die gen jherusalem farende von eynem konig Cypri geswechet was wor

F206-036v,01 den hatt gantz zerstoret . vnd das landt dar an stossende verwoestet . // Von disser statt vff funffzig mylen ist eyn ander statt habende eyn port . zuo welchem man gemeynlichen zuo lendet . vnd heysset Limisyn . welche statt eyn Soldan vor zyten hatt gantz vmb gekeret . Daselbet wo man grebt yn das ertrich by dem mer da vindet man suß

F206-036v,02 wasser . Daselbet am nechsten tag nach Sant johans des teuffers was der . xxvj . tag deß moneds junij . kamen wir in den port Cypri . Cyprus ist eyn konigliche jnsel . nach der lenge hundert vnd funff vnd subitzig schritt habende . Aber an der breytte hun

F206-036v,03 dert vnd funff vnd tzwenzig tusent . // Jn disser ynsel nach vßwyssunge der alten historien hat japhet noe sun zum ersten gewonet vnd sie erbuwet . wiewol die poeten sagen man hab daryn ge

F206-036v,04 wonet vor dem gemeynen syndtfluß . Disse ynsel heyßet mit dem an

F206-036v,05 dern namen Cethym in der geschriff . Sie wurt auch genant Paphon von eyner statt daryn also geheysen . do man noch hutt gar wunder

F206-036v,06 barlich vervallen gebuwe vindet . welche statt Paphus Pigmaleoniß son von Eburnea geboren hatt erbuwen . vnd Veneri gewyhet der er auch daselbet gar eyn kostlichen tempel vff richtet . zuo welchem tempel do he

F206-036v,07 lena vß grecia quam vber mer wart sye geraubt vnd verzucket von Pa

- F206-036v,08 riß . darvß der groß krieg zehen jar werende zwuschen den kriegschen vnd Troyanen eyn vrsprung gewan . An dem selbigen ende wurd noch ge
- F206-036v,09 zeugt veneris gart . yn welchem Pallas . juno . vnd venus eyn gezenck hetten der schoenheit halb als die gemeyn historia davon luttende ynhalt By der selbigen statt liget eyn hoher berg wurt genant frauw Venus berg . wan da hatt sye gewonet . vnd das landt Tusciam also genant nie gesehen . da ettlich lutt sye vermeynen yn eym berg verslossen syn vnd groß lust vnd freüd daryn haben daran doch nichts ist . // Jtem disse jnsel ist vor zyten gar namhafftig gewesen vnd rich von ertzgeschmyde . deß gebruch auch zum ersten saget man da erfunden syn . // Jtem sye ist fruchtbar von wyn . welche daselbet gar guott vnd sere starck syn . // Jtem sye hatt vil adelicher stett . vnder welchem Nycosia die haubt
- F206-036v,10 statt ist . // Jtem sye ist beslossen vff alle syten mit dem mer . aber ynwendig mit welden . velden . wyessen . eckern . wyngarten . vnd allerley geschlecht fruch
- F206-036v,11 ten wolgezyeret . mit brunnen vnd anderen lustlichen wasseren durch
- F206-036v,12 fliessen . vnd mit vil richtum vnd wollust begabet . darvmb nach gemey
- F206-036v,13 nem sprnch(eß sy ioch von ynfluß der hymel oder laster vnd neygung der ynwoner) so syn die menschen darynn also schnell zuo vnluterkeyt daz disse jnsel eyn gasthuß oder besndere kammer aller wollustikeyt wurd genennet . // Jtem vff dem allerhochsten berg disser jnsel ist eyn kyrch daryn das crütz deß schechers zuo der rechten syten jhesu gegangen . gantz wardt be
- F206-036v,14 haltn . vnd hatt man von demselben crütz gar eyn wunderliche histo
- F206-036v,15 rie do . // Jtem zuo Nicosia yn der kyrchen sancte Sophie ist eyn grab von itel vnd eynem gantzen edelen steyn jaspis gemachet . habende zwolff span
- F206-036v,16 nen an der lenge . vij . an der dieffe funff an der breyte . vnd eyn wenig mee dan eyn gantze span an der dicke zuo ryng vmb die hoele . vnd eyn grosse bedeckung von oben deß selbigen edelen gesteyn . welhes grab on maß vnd vber all schatzung koesperlich ist . vnd wurd geeret eben wye daß grab cri
- F206-036v,17 sti zuo jherusalem . Da hatt man auch eyn schone legend von . wie die yn
- F206-036v,18 woner diser ynsel Cipry diß grab da cristus noch lebet . vnd yn dem ju
- F206-036v,19 dischen land prediget ym haben gemachet Jtem dyse ynkel liget dryhundert mylen von Rodiß ym meer . Ven ist vor zyten gewesen ein teyl deß lands Macedonie . Darnach worden ein eygen konigrich . Vnd ytz zuolest vnder gewalt vnd herschung der vene
- F206-036v,20 diger kommen . do man vyl von schriben moecht daz ich doch vmb kurtz wegen laß an sten . AM . xxvij . tag deß moneds junij fuoren wir vß Cypro mit guo
- F206-036v,21 tem wynd . vnd quamen ynwendig dryen tagen an das ende ym mer von dannen wir das heylig land mochten schawen . Vß welcher vrsach wir gar großlich erfrauwet gruofeten das
- F206-036v,22 selbe als eß billich was mit lob gesang . frolichen vnd andechtlichen syn
- F206-036v,23 gende Te deum laudamus 7c . mit dem Antiphon Salue regina . vnd gebetten oder Collecten darzuo gebuorende . Also mit dissem komen wir fur die statt Japha oder joppen genant . eyn wenig vom land durch yn geworffen ancker vnser galee yn dem meer hefften . Von dannen sendette vnser patron als dan gewonheyt ist ettlichen sy
- F206-036v,24 ner knecht gen Rama vnd jherusalem vmb fry geleyt . auch nach dem Gardian der myner bruoder yn dem Closter vff dem berg Syon won
- F206-036v,25 hafftig . deßglichen nach dem geleytzman der pilger . welchen man nach derselbigen sprach trutzelmann heyßet . Derselbigen waren wir sechs gantzer tag warten vff den mer an der vorrigen statt ligende . ynwendig der selbigen zyt quam der ander Patron Petrus landawe genant . mitt syner galee . vnd mit den pilgern vnsern mitbrüderen nit verr von vns als eyn armbrust schuß syn galee vestigen . welcher auch von stund an nach dem geleyd sandet wie vnser patron . Inwendig der selbigen tagen ettlich von beder galee schiffknechten . galeothen genant . fuoren fisch va
- F206-036v,26 hen in der heyden wasser . da wurden sye gefangen . vnd von den heyden vbel geschlagen vnd swerlichen verwundet . Zuo zyten fuoren wir auch in den selbigen tagen mit vnserm Patron an das landt vmbwegen wyn vnd brott vnd frucht . besunder zyttig truben vnd andere spyß tzuo kauffen . Darnach an dem funfften tag des moneds julij quamen die mamma
- F206-037r,01 lucken das ist reyssig knecht . verlaugnet cristen . deß Soldanß hofflutt mitsampt dem trutzelman von jherusalem vnd Rama . bringende mit ynen den Gardian ob genant selb tridt synes ordenßbruder . vnd eyn ge
- F206-037r,02 schriben geleyt . Nach zuokunfft der selbigen wurden vnser mittbrüder die in Peters landawe galee waren gefaren in eyn alte hoele vnnd zer
- F206-037r,03 brochen gewelbe verslossen . daryn sie dry tag vnd nacht muosten bliben Aber wir durch fursichtikeyt vnser Patronen belyben in vnserm galee vß genomen eyn nacht die wir auch in derselben hoelen muosten verlos
- F206-037r,04 sen syn . Dan die gewonheyt halten die heyden daz sye alle cristen pilger mit yren eygen namen vnd yrer vetter . bezeychnet an schriben . vnd also zelen in das selbig alt gewelbe . daryn sie müssen blyben verschlossen so lang byß sye mit dem Patron vmb das gleyt nach yrem willen vber
- F206-037r,05 kommen . doch fur doe selbig hoele komen die cristen von dem guortel von jherusalem vnd Rama von sant Paulus glauben genant . bringende mit ynen wyn vnd brott . kocht fleysch . huoner . eyer . vnd frucht . auch an

- F206-037r,06 der kleynheyten . veyl bietten vmb yr gelt . darvon die verslossen pilger kauffen was sye gelustet . AM achten tag deß moneds julij . bracht mann vns pilgeren gen Japha esel durch den patron bestellet . vff welchen wir von japha ritten gen Rama . ist zehen welcher mylen ynwen
- F206-037r,07 dig dryen stunden . Japha ist verzytten gewesen eyn grosse vnnd namhafftige statt joppe genant oder japha . von japhet Noe son . der sye zum ersten hatt erbu
- F206-037r,08 wen . vnd nach synen namen sye genennet . vnd ist gewesen die achste statt vnder denen die wider den syndtfluß der zuo noe zyt was . wurden in der welt gebuwen . darvmb auch noch hutt gar groß yßin ring an eynem grossen velsen in dem mer hangen daran die schiff wurden gehefftet . Dasselbet sycht man auch eyn kettin gar wunderlichen groß damit eyn ryß Andromadus genant ward gefenglich behalten . welches eyn ryp das man noch da sehet hangen eyn vnd viertzig schw hatt hebt an der lenge . Disse statt japha ist vor langer zytt gantz zerstoret worden . vß genomen zwen thurn die noch da stan . Als wir aber gar schyer gen Rama quamen vff ein acker lenge . musten wir ab stygen von den eselen vnd zuo fuß gen . vnd eyn yeder syn ding
- F206-037r,09 lach vff synem hals tragen . daz vns deßhalb swer was . dan eß gar heiß was vnd eyn grosser staub . Die heyden lassent keyn cristen in Rama zuo roß oder esel in kommen . // Jtem da wir da hyn quamen wurden wir aber in eyn alt huß geze
- F206-037r,10 let vnd verschlossen daryn vil gewelb syn vnd eyn guotter brun . welches huß Philippus ettwan eyn hertzog von burgundien loblicher gedecht
- F206-037r,11 nüß hatt zuo eyner herberg der bilgeren gekauffet . vnd den mynern bruo
- F206-037r,12 dern deß bergs Syon bevollen . darvmb eß auch eyn Spytal der bilger wurt genennet . Von Japha rytten mit vns gen Rama der herr von Rama vnd der trutzelman von jherusalem mit zwyhundert pferden . vns geleytende . vnd verhuotende vor den heyden vnd yren wyben vnd kynderen . die sich yn den dorffen vnd in dem velde versamelen mit grosser zal . vnnd werffen mit steynen in die pilgeren . vnd zuo zyten werffen sie ettlich zuo tod . also daz die geleytzsluth die pilger kum mogen beschyrmten . demnach der weg von japha biß gen Rama vß sollicher vrsach gar sorglich ist . // Jtem zuo Rama ist eyn sweyßbad . gar mit grosser klugheyt erbu
- F206-037r,13 wen . in vier thurn vervasset . vnd gat die hitz von vnden vff durch eyn gewelb von marmelsteyn besetzt . Wir belyben dry tag zuo Rama . vß der vrsach gehyndert . wan zwen Capitanei sluogen sich mit eynander . der eyn herr Amor genant fuorend eyn wyß fenlyn verlort . xvij . syner diener mitsamt synem lyplichen bruoder . Der ander herr Naballeus geheysen . eyn rot fenlyn fuorend . behilt das veld vnd syg . der auch vns beleytet stettiglichen . vnd yme zuoliebe . muosten wir dry tag do verzye
- F206-037r,14 hen . AM . ix . tag des moneds julij vß geheyß des Gardian laß ey
- F206-037r,15 ner syner bruoder meß zuo Rama vor vns . vnd do er quam an das offertorium . wendet er sich vmb gegen vns . vnd gab vns vnderwysung wie wir vns solten halten in den heiligen lande in welscher . teütscher . vnd latinischer zungen vff meynung hye nachvol
- F206-037r,16 gend . vff funff artickel gesatzt . sprechend also . yr allerliebsten damit yr sollichen grossen kosten vnd arbeyt nit vmb
- F206-037r,17 suß haben gehabt auch werden haben vnd thuon diße heylige fart zuo vol
- F206-037r,18 bringen . ist vch wol zü mercken // Zum ersten ob es sach were daz yeman vnder uch on erlaubung vn
- F206-037r,19 sers heilisten vatters des babsts her were kommen vnd deßhalb in bebst
- F206-037r,20 lichem bande were . der wiß daz vnser vatter Gardian gewalt hatt den
- F206-037r,21 selben darvß zuo entbinden vnd absoluteren . daz er auch gern wil thuon so er deßhalb wurde ersuochet . damit der selb pilger des grossen ablaß teylhafftig vnd nit beraubt werde . den man in dissien heyligen landen mag ervolgen . // Zum andern ist not daz uwer eyn yeder eyn gantzen volkomen glau
- F206-037r,22 ben habe anders were eß alles vmbsust . // Czum dritten daz uwer eyn yeder habe eyn lutere conscientz vnd eyn ware ruow fur syn vergangen sund . vnd eyn guotten fursatz sich hienach zuo huotten vor sunden . // Czum vierden daz uwer eyn yeder sich selbs erquickte vnd ermane . auch vbe mit allem fliß vnd andacht die heiligen stett heym zuo suochen . yn wel
- F206-037r,23 chem vnser seligmacher jhesus vnser erloßung vnd heyl hatt gewircket . vnd geschaffen inmitten disser welt . // Czum funfften uwer eyn yeder huott sich mit hohem flyß . daz er nun
- F206-037r,24 mer vff keyn heydnesh grab tritt oder gang . wan sye das nit muogen ly
- F206-037r,25 den oder vertragen . sunder wo sye das wurden mercken vnnd sehen . sye mochten uch ertodten . Als der priester disse ding hett gesaget . vollenbracht er furhyn die meß biß zuo end . nach welcher wir wyder in den Spital giengen . da quamen die cristen von den guortel bringen veyl kochte spyß . aber wyn mag man nit wol da haben oder veyl vinden . darvmb die pilger yren wyn vß den galee pflegen mit yn da hyn zuo fuoren . vnd syttemal es dan suntag was blyben wir den selbigen tag vol da ruogende . UVrhyn ist wol zuo mercken andechtigen pilgern was grosser ablaß vnd gnad verluhen vnd geben ist disse heyligen stett vnd lande heymsuochenden cristen menschen . Czum allerersten von dem babst Siluestro vmb bitt wegen des cristenlichsten key
- F206-037r,26 sers Constantini . vnd syner muoter Helene . welcher ablaß vnnd gnad durch ander bebst syn

nachkomer ist bestettiget worden vnd volzogen biß vff disse zyt . // Czum ersten alle die cristglaubigen menschen die disse reyß oder fart vnderstan vnd geruwet vnnd gebicht haben . auch vmb wegen sollich gnad zuo erlangen vber mer faren . sobald sye vß der galee gen vnd vff das heylyg land tretten ervolgen sye voll vergebung aller yren sunden von pyn vnd schuld genant . // Jtem an dem ende da die pilger gemeynlichen pflegen vff dem mer zuo land farent ist der prophet jonas vor zyten in eyn schiff gangen . vff das das er fluohe von dem angesichte gottes in die jnsel Tharsis geheys

F206-037r,27 sen . als man in dem buochlyn syner prophecy vindet . // Jtem zuo japha hatt sant Peter der furst der . xij . botte Thabitam die heylyg frauwe von dem todt zum leben erquicket als man in dem buoch von den wercken der . xij . botten leset . // Jtem nit verr von japha ist die statt da sant Peter pflaget fisch zuo vahren . daselbet ist ablaß . vij . jar vnd . vij . karen . // Jtem von Rama vff zwo mylen kompt man zuo eyner anderen stat Lidda genant . da ist eyn kyrch in der ere sant jorgen des heiligen mar

F206-037r,28 terers gewyhet . an dem ende gebuwet da er gemartert ist worden vnnd syn haubt ym ab geschlagen . In derselben statt hatt sant Peter den bethryssen Eneam genant der acht jar kranck was gelegen gesunt gemacht . als auch das buoch von den wercken der . xij . botten vß wyset . da ist auch ablaß suoben jar vnnd suoben karen . UOn Rama zogen wir am eylfften tag deß moneds julij vmb die ander stund der nacht . vnd ritten den selbigen gantzen tag gen jherusalem . ist . xxx . guoter welscher mylen von Rama . Nit verr von Rama vff die linck handt ist das Castel Emaus woll bekant vß dem euangelio . xx . mylen verr von Rama ligend . aber achzig roßlauff von jherusalem . daselbet liget sant Cleophas eyner von zwen vnd suobitzigsten jungeren begraben . Nit verr von Emaus ist das stettlyn Modin von dem die machabei burtig waren . Von dannen nit verr gegen jherusalem ist der prophet Samuel vff ey

F206-037r,29 nem hohen berg begraben nahe by dem dorfflyn Ramatha von dannen Samuel burtig was vnd Joseph von Aramathia des das grab was daryn cristus nach synem tod gelegt ward . vnd an allen dissen enden ist ablaß . vij . jar vnd . vij . karen . Von dem yngang gen jherusalem . WJewel gar vil heylicher stett syn zuo jherusalem die die andech

F206-037r,30 tigen bilger heym suochen . so hatt doch das heylyg grab cristi vnd der tempel daryn das heylyg grab ist groß wurde vnnd fryheyte fur all ander . Dahyn quamen wir am vorgemelten tag vff den abent . vnd styegen ab von vnsern eseln als dan billich waz vnd giengen zuo fuß in die heylyg statt jherusalem . Vnd in dem ersten yngang derselbigen ist voll vergebung aller sund . auch wurd keynen bilger verhenget dahyn yn zuo ritten . Vnd zum allerersten kamen wir noch denselben abent fur den tempel deß heylygen grabes vmb willen den ablaß zuo erlangen . vnd glich von dannen wurden wir gefuoret in den bilger Spital nit verr von dem sel

F206-037r,31 bigen tempel stend . aber ich mitt myner gesellschaft die mitt mir vber mer was komen giengen in deß kleynen calynß huß by dem Spytal . welcher calyn der bilder dolmetsch ist . vnd gewonlichen mit den bilge

F206-037r,32 ren zuo sant Katherin zu get . der beherbergt vnß in synem huß vnnd gab vns eyn kammer yn . daryn wir das vberig teyl deß selben tags ruogeten wan wir eyn groß teyl deß selbigen vnd eyn teyl der nacht geritten het

F206-037r,33 ten vnd waren sere müde . Von den heylygen stetten zuo jherusalem zwuoschen dem Spytal der pilger ytz ge

F206-037r,34 nant vnd dem berg Syon ligende . AM . xij . tag deß moneds julij was sonntag . kamen wir pilger all zuosamen vnd giengen vff den berg Syon . vff dem weg all heylyg stett heym suochend . // Czum ersten kamen wir an die statt do die juden als die junger cristi den heylygen lychnam der wirdigen muoter gottes marie truogen zuo begrebnuß yn das tall josaphat . wolten denselben mit ge

F206-037r,35 walt nemen . // Von dannen kamen wir glich bald an die statt do sanctus Petrus nach der dritten verleugnuß vnsern herren vß gangen vß Cayphe huß ylet yn eyn hoele darynne er gar bitterlichen weynet . // Von dannen kamen wir yn die kyrch zuo den heylygen engeln genant . do vor zyten Anne des bischoffs huß stuond . In welchem vnser herr jhe

F206-037r,36 sus als er vom oelberg daryn gefurt ward groß smacheyt enpfienge ge

F206-040v,01 slagen von eynem diener an syn heylygen backen . oder syn gottlich an

F206-040v,02 gesicht . // Von dannen kamen wir yn eyn andere kyrch zuo sant Saluator geheysen . do vor zyten das huß Cayphe . eyn groß eckhüsz stunde . In welchem vnser herr jhesus ver

F206-040v,03 spottet . syn augen verbunden . yn syn angesicht vnd an synen heylygen nack geschlagen . vnd yn vil ander weg gesmecht vnd gepinigt ward . Do selbet zeuget man auch den pilgren ein enges stettlyn daryn die ju

F206-040v,04 den vnsern herrn verslossen biß daz sye radt gehalten waz sie mit yme wolten thuon . vnd wurd das selb stettlyn vnsern herren kerker genant . vnd wiewol dasselb nit wurd gefunden in den euangelien . dan nitt alle ding vnsern herren leben oder liden an treffend syn beschrieben . doch vmbwegen daz derselb kerker noch huott da ist vnd wurd gezeyget . mitt gezugnüß vnd kuntschafft so man darvon sagt vnd gibt . mag man eß gütlichen glauben als auch andere ding die man nit vindet geschriben yn den euangelien . // In derselben kyrchen ist der groß steyn den der engel vmb wendet vor dem grab cristi lygend vnd saß darvff . Vnd ist ytz derselb steyn eyn tisch des hohen altars yn derselben kyrchen . // Do selbet yn eym hoff zuo der lyncken hant . ist eyn baum mit steynen vmbgeben . do die dyener der juden vnd Petrus mit ynen sich wermtten by dem feier . // So man vß demselben hoff vff die gaß gett zuo der rech

F206-040v,05 ten hant . ist eyn steyn an eym eck . do die muoter gottes maria stunde als sant Peter bitterlichen weynend . gieng vß Cayphe huß vnd mocht vor grossem weynen marie der jungfrauwen fragende von yrem lieben kyn

F206-040v,06 de nit antworten . An demselben end maria begirdig zuo wissen von jhesu wie eß vmb yn stunde .

ist belyeben stan biß eß morgen früw ward als man jhesum fur pylatum fuoret gebunden . dahyn auch sie mit grossem leyd vnd smertzen vngezwifelt nach volget . // Von dannen kamen wir in eyn andere alte zerbrochene kyrch . alleyn mit steynen vmbgemuret . An welchem ende die jungfrau maria nach dem tod vnd vfferstennung cristi jhesu yres lieben kyndes . wol . xiiij . jar hatt gewonet . Vnd ist an demselben ende vergebung aller sunde . Aber an allen ob genannten stetten ablaß . vij . jar vnd . vij . karen . Daz aber disse letzte statt nit wurd von den cristen widergebuwet . ist nit yr . sunder der heyden schuld . die nit lassen doselbet buwen . // Nahe by dissem ende sehet man noch zeychen eyner alten Capell so ett

F206-040v,07 wan do ist gestanden . yn welcher sanctus johannes euangelista . als eyn besunder capellan der jungfrau maria . yr nach vnsers herren vffart zuo hymel . offt vnd dick meß hatt gehalten . vnd wurd noch doselbet be

F206-040v,08 wyset der altarsteyn darvff er meß hette . Doselbet ist auch die statt do sanctus Mathias ward an judas statt erwelet zuo eynem apostel . vnnd ist dieselb statt mit eynem roten steyn sunderlichen bezeychnet . // Von dannen gegen dem berg Syon vff zuo stygen . wurd bewiesen die statt do die muoter gotts teglich yr andechtig gebett vollenbracht . Doselbet syn auch zwen steyn . vff welcher eynem vnser herr jhesus dick ist gesessen predigen synen jungern . vff dem andern syne werde muoter be

F206-040v,09 girlichen horend syne suße lere . Von dannen baß vff stygen . ist die be

F206-040v,10 grebnüß der propheten vnd der kongen jsrahel . ein teil vnder der kyrchen des bergs Syon . eyn teyl darvß . da Daud Salomon vnd ander ko

F206-040v,11 nig lygen . Czu der selben begrebnüß laßen die Sarraceni keynen cri

F206-040v,12 stenmenschen kommen . wan sye ynen selber eyn kyrch oder muschkeam(nach yr sprach) do haben gebuwet . die sie auch yn grossen eren halten vnd wer gott nit mir vnd mynen mitbrudern ettlichen edelen . so mit mir daryn kamen großlichen gewesen . so weren wir zuo stucken zerhau

F206-040v,13 wen worden von den sarracenen . die vnversehen vns da begriffen . aber wir entrunen durch gnad gotts . Nit verr von dannen ist die statt do sant Stephan der erst marterer zum andern mal begraben ward . vnnd by ym sanctus Gamaliel sancti Pauli lerer vnnd Abybas desselben sun . vnd sanctus Nicodemus . all getaufft nach vnsers herren vffart zuo hymel . Gleich nahe daby ist die statt do ettwan was der groß cenackel eyn sum

F206-040v,14 merhuß . do das osterlemlyn vß cristi jhesu geheuyß durch syne junger ward gebraten daz er am letzten nachtmal mit ynen doselbet aß . // Am selbigen ende ward auch das wasser gewermet damit vnser herre die fuß syner jungern weschet // Allernest daby ist die stat da dauid buoß hat gethan vmbwegen daz er den ritter Vrian hett geschaffet erschlagen werden in eym stritt . mit des hußfrauwen er zuo thon hett . an welchem ende er die suoben psalmen(als wir sye heyssen der buß) hatt durch gott den heyiligen geyst vngezwifelt gedichtet . // An dissem ende han die indianer ynen eyn closterlyn gemacht . In allen ob geschriben stetten ist ablaß . vij . jar vnd . vij . karen . Nach allen sollichen heyiligen stetten beschauwet vnd durchgangen quamen wir in das closter vff dem berg Syon ligen . darynn die mynerbruder wonen . da ist eyn gar schone vnd gewelbete kyrch . welche vmbwegen vnser zuokunfft gar huobsch gezyeret was . mit kostlichen ge

F206-040v,15 wirkten teichen die yne eyn hertzog von Burgundia Philippus ge

F206-040v,16 nant mitsamt vil anderen kostlichen ornatten vnd gotsgezyerden . auch mit dusent dücaten jerlicher gult da hyn geben hatt diewyle er yn leben was . zu eynem zeychen syner andacht zuo den heyiligen stetten . vnd vmbwegen enthaltung der bruder daselbet gott dienend . Welches auch syn sun hertzog Karolus selig loblicher gedechtnüß hat gehalten yn synem leben . Welches auch syn nachkomen Ertzhertzog Maximi

F206-040v,17 lianus in Burgundia regnyren ytz der zyt eyn Roemscher konig durch all kurfursten eynhelliglichen erwelet zuo Franckfort in der ersten vast

F206-040v,18 wochen jm jar . M . cccc . vnd . lxxxvj vollenbringet . Sobald wir yn die selbig kyrch kamen viengen die bruder eyn herlich ampt der meß an zuo syngen . Nach vollendung deß selbigen thetten sye eyn procession der wir nach volgeten . vnd quamen also fur gende an stett hye nach gende . // Zum ersten an die statt da vnser herr jhesus mit synen jungern das letzt nachtmal hatt gessen . vnnd das sacrament synes fronlichnamß vnd heyiligen bluotes . vnder gestalt deß brots vnd wynes vff gesatzt . Daselbet stett ytz der hohe altar in dem chor . vnd ist da vergebung aller sunde . // Czu der rechten syten deßselben altars ist die statt da vnser her synen jungern die fuß wusch . // Vßwendig dem chor ist die statt da gott der heylig geyst am pfingst

F206-040v,19 tag yn gestalt furer zungen den jungern cristi gesandte ward Vnder welcher statt ist die Capel von welcher ob geschriben stett . darynn die begrebnüß der konig vnd propheten jsrahel ist . darynn wir durch eyn fenster sahen . da ist auch vergebung aller sund . // Von dannen nit verr ist die stat da vnser herre jhesus nach syner vff

F206-040v,20 erstennung durch beslossen thür yn gende erscheyne an dem ostertag . vnd darnach widervmb am achten tag yn bywesen sancti Thome . da ist ablaß . vij . jar vnd . vij karen . Aber der babst Sixtus der vierd deß na

F206-040v,21 mens hatt geben daselbet ablaß aller sunde von pyn vnd schuld . // Als diß procession eyn end hette . wurden wir geladen von dem Gar

F206-040v,22 dian vnd synen brudern als gewonheyt ist mit ynen zuo essen . darvmb vnd ander yrer dienstbarkeyt vns offt vnd dick fruntlichen bewyeten vnd erzeugt . wir ynen billich widerlegung thetten eyn yeder nach sy

- F206-040v,23 nem vermoogen // Als wir gessen hetten vnd wider kerten in vnser herberg . vnderwe
 F206-040v,24 gen quamen wir in eyn kyrch die ytz die jacobiten ynn halten . an wel
 F206-040v,25 chem ende Herodes sant Jacob den grosseren ließ enthaubten . da ist aber ablaß . vij . jar vnd . vij .
 karen . // Nahe daby ist die statt da cristus nach syner vfferstennung sancte ma
 F206-040v,26 rie magdalene vnd andern andechtigen frauwen als sie von synen grab quamen gende erscheyn sye
 gruossende . da sye auch zuo ym tratten vnd ym syn fuß hielten . Daselbet ist aber ablaß . vij . jar vnd . vij . karen .
 Sittental aber wir die nach folgende nacht nach alter gewonheyt sol
 F206-040v,27 ten ynn den tempel deß heylichen grabß gelassen werden . gaben wir vns zuo ruog eyn cleyne zytt
 ynn vnser herberg . // Hye ist zuo mercken daz die heylich statt jherusalem an eym hohenn ende liget . nach der an
 stossende lantschafft zuo rechen . also daz man vß Jherusalem sehet das gantz lant Arabiam . vnd das hoch gebirge Aba
 F206-040v,28 tym vnd Nebo vnd Phasga . vnd die ebenne deß jordans vnd jericho . vnd das todt mer byß zuo
 dem velßen der wuosteny eyn statt also genant . deß halb Jherusalem gar eyn schone vmbsehung hatt . vnd man muß an
 allen enden vff stygen dargegen wan sie hoher ligt dan keyn andere statt yn demselben landt . vß genommen Sylo zwo
 mylen davon li
 F206-040v,29 gende . Diß ist die gestalt vnd form deß tempels deß heylichen grabes zuo jherusa
 F206-040v,30 lem von vßen . // Vor dem tempel des heylichen grabes lygt der steyn darvff cristus viel syn crütz
 eragen . // Von dem ynngang in den tempel deß heylichen grabes vnd von der processio zuo den heylichen stetten daryn
 gethon . AM . xij . tag deß moneds julij vff den abent worden wir von den heyden nemlich reygerer der statt jherusalem
 yn gelassen vnd gezelet in den wirdigen tempel deß hei
 F206-040v,31 ligen grabes . darvmb vnser eyn yeder funff ducatten musten geben . vnd wurt disser tempel sust
 nummer vff gethan von den heyden . dan vmb der bilger wegen so sye dar kommen . oder vmbwegen zuo verenderen die
 bruoder die daryn gelassen werden . den tempel vnd die heylichen stett ynnwendig zuo verhuo
 F206-040v,32 ten . Sobald wir dar ynn quamen wurden wir daryn verslossen . mitt
 F206-040v,33 sampt dem Gardian vnd vil syner bruoder die mit vns dar yn giengen Sobald eyn cristenmensch oder
 eyn bilger syn fuß yn den tempel setzt erlanget er volle vergebung aller syner sunde . // Deß heylichen Tempels darynn
 das grab cristi ist form vnd fi
 F206-040v,34 gur ist diße . Die kyrch ist rontt . vnd hatt vber zwerch zwuoschen den sulen dry vnnd subitzig
 schw . vnnd absyten . die haben zuo ringymb von der vßwendig
 F206-040v,35 gen muren der kyrchen zehen schw vber das grab vnsers herren . ob wel
 F206-040v,36 chem in mittel der selben kyrchen eyn ruonde offene ist . also daz das hey
 F206-040v,37 lig grab gantz vnder dem hymel bloß stett . Aber die kyrch Golgatha ist daran gebuwen vnd vervasset
 an statt vnd in form eynes koreß an die kyrch des heylichen grabes . doch eyn wenig nydderer . vnd syn beyde vnder eynem
 tach . Die Capell darynn das grab vnsers herren ist . hatt an der lenge acht schw . an der breyte auch acht schw zuo
 ringymb vßwendig mit marmel bedeckt vnd vmbgeben . aber ynnwendig ist eß eyn velß als eß was zuo der zyt als vnser
 herr darynn geleget ward . In die capell geet eyn thür von orient gar nyder vnd cleyne . vnnd so man dar yn geet ist das
 heylich grab zuo der rechten handt an der wandt gegen mitternacht von marmelgraer farbe . dry spannen hohe von dem
 pauiment acht schw lange als auch ynnwendig die krufft oder capel ist vnd ist zuo allen orthen beschlossen . keyn liecht
 habend ynnwendig von vßen . wan da keyn fenster ist das liecht dar yn gebe . sunder . ix . ampeln vber dem grab vnsers
 herren . geben liecht ynnwendig . Eyn ander capel ist vor disser capel oder spelunca deß heylichen grabes . gleicher lenge
 vnd breyte vnd gischickt von ynnen vnd vsszen . vnd so eyner sye an sycht vßwendig . so wenet er eß sy eyne . so aber
 eyner ynwen
 F206-040v,38 dig ist . so sehet er sye von eynander durch eyn mittelle wandt geschey
 F206-040v,39 den . vnd geet man zum ersten yn die vßwendig . vnd darnach in die dar
 F206-040v,40 ynn das heilig grab ist . In disse vßwendig capel giengen die heylichen frauwen da sye sprachen . wer
 wendet vns den steyn vmb von der thur des grabes . damit die thur beslossen was . wan derselbig steyn ward ge
 F206-041r,01 legt fur die thur der ynnwendigen speluncken . vnd liget noch hütt eyn groß teyl desselben steynß vor
 der thur derselben ynnwendigen spelun
 F206-041r,02 ken . Aber das ander teyl ist vff dem berg Syon yn dem hohen altar der kyrchen . // Jtem der berg
 Caluarie vff dem vnser herr gecrutziget ist worden ist suoben hundert schw verr von der statt des heiligen grabes . vnd
 muß man vff stygen biß an das ende da das heilig crutz yn eyn velßen ward gesenc
 F206-041r,03 ket achtzehen schw von den pauiment der kyrchen vber sich . Das loch deß selben velsen ist so wyth
 daz eyn mensch syn haubt mag daryn thun . vnd gett der ryß nach der lenge des selbigen velsen von oben an da das
 crütz yn gesencket ward byß vff das pauiment der kyrchen hyn nyden achtzehen schw . Vnd erschynet noch hütt die farbe
 deß bluotes vnsers herren jhesu cristi yn dem ryß desselben velsen . welcher ryß geschahe vnder der lync
 F206-041r,04 ken handt cristi als er am crutz versched . // An demselben ende ist eyn schoener altar gebuwet
 worden . vnd ist das pauiment derselbigen capel daryn der altar ist gantz von marmelsteyn besetzt . vnd die wende mit
 marmel vberzogen vnd von lutherem goldt mit muossyrtem werck ge
 F206-041r,05 tzieret . Das loch aber daryn das crütz gesencket ward ist zweyer span

- F206-041r,06 nen tyeff . // Jtem von dem berg Caluarie . xxiiij . schw gegen orient ist eyn altar darvnder ist ein teyl der sulen vß pylatus hüß da hyn gebracht daran vnser herre jhesus gegeyßelt ist worden . vnd ist vnder dem steyn des al
- F206-041r,07 tars also verdeckt daz man sye doch mag sehen . an tasten vnd kussen eyns teyls . Vnd ist die selb sull von eym steyn . eyns teyls swertzlecht doch nit gantz vil roter macen natürlich habend . welche das gemeyn volck vermeynet syn tropfen des bluots vnsers herren jhesu cristi daran gegeyßlet . Das ander teyl der selben sulen saget man ettwan gen Con
- F206-041r,08 stantinopol syn gefuoret worden . Von dissem altar obgemeldet der su
- F206-041r,09 len zehen schw gegen orient . gett man . xlvij . staffeln ab . zuo der statt . do sancta helena das heilig crutz cristi hatt gefunden . Do ist eyn capel vnd zwen altar darynn . vnder der erden . Die statt daryn das heilig crutz ward geworffen mitsamt den andren zweyen als die corpel davon worden ab genomen . beduncket mich gewesen eyn von den stattgraben daryn vil erd kalck vnd gemulw ist geworffen worden da jherusalem wardt zerstoreet . byß daz derselbe grabe durch gebott vnd geheiß sancte Helene ward gefeget vnd gereyniget . wan nahe by der statt wart vnser herr gecruziget . demnach gleyblich ist daz die crutz all dry in ey
- F206-041r,10 nen stattgraben wurden geworffen . Die statt aber do die jungfrauwe maria mitsamt andern heiligen frauen stuon by dem crutz . ist nit ge
- F206-041r,11 wesen vnder eym arm des crutzes gegen mitternacht als etlich wollen sagen . sunder vor dem angesicht vnsers herren eynwenig gegen occident Wan man zeuget dasselb end noch disser zyt vff maß ytz beschrieben . vnder dem berg Caluarie vnd velßen darin das heilig crütz ward ge
- F206-041r,12 sencket . vnd wurd dasselb end in grosser ere gehalten von den gleubi
- F206-041r,13 gen . als auch billich ist . Vnser herr hatt auch am crütz hangend syn an
- F206-041r,14 gesicht gewendet gehabt gegen occident . daz man hyrvß mag mercken . wan das ort im stattgraben daryn das crutz geworffen ward . gegen oc
- F206-041r,15 cident wesen . ist hynder dem crutz derzyt gelegen . // Jtem vil altar syn in dissem tempel . gar zymlichen geordnet vnd gezyeret . Vor der thür disser kyrchen gegen occident . ist die statt da maria egipciaca . bettende vor dem bild der jungfrauen marie als sye ward verhalten vnd ver
- F206-041r,16 hynderet vß gotts verhengnuß . daz sie nit mocht in den tempel yn gan enpfing ein trostlich antwort vnd ward gelassen yn den tempel zuo gan als ander menschen . // Ander heilig stett disses tempels die wir in der nacht heymsuchten mit der procession gand . mit denen mynernbruodern die vns fuor giengen syn disse in besunder . // Zum ersten die capel des heyiligen grabes vnsers herrn davon ytz ob ist gesaget worden . // Darnach eyn capel in der ere der jungfrauen marie gewyhet . darin die ob genanten bruoder sich an thetten mit meßgewand 7c . vnd ein lob
- F206-041r,17 lich procession an fiengen mit der letany . der wir nach folgten mit ge
- F206-041r,18 bett vnd andacht als billich was . Vnd kamen zuoerst zuo dem hohen altar derselben capellen . gebuwen an dem end do vnser herr jhesus syner wer
- F206-041r,19 den muoter zum ersten erscheyn nach syner vfferstennung . // Jn der seben Capel ist auch eyn stück der sulen daran vnser herr ge
- F206-041r,20 bunden . gegeyßelet ward . Vnd ist an disem end vergebung aller sund . 7c . // Jtem eyn ander stück derselben sulen dissem glich groß . ist als man sagt zuo Rom in sant Praxedis kyrch . // Jtem noch ein ander stück von derselben sulen ist zuo lugdun nach ettlicher sage yn der thuomkyrchen . // Jtem eyn altar ist in der ob genanten capel . zuo der lyncken sy
- F206-041r,21 ten des hohen altars . an welchem end das heilig crütz cristi lang zyt ist gantz gestanden nachdem als es ward gefunden durch sanctan helenan . Doselbet ist noch eyn stuck oder teyl des heyiligen crutz verhalten vnd beschlossen . Do ist aplaß . vij . jar vnd . vij karen . // Jtem in mittel derselben Capel ist eyn ront marmelsteyn . ligende an dem ende . do eyn todte frauwe beruort mit dem crutz cristi ward er
- F206-041r,22 qwicket vom tod zum leben . zuo der zyt der vindung desselben . damit vn
- F206-041r,23 derschiedung zuo haben . vnder dem crutz cristi vnd den andern zweyen der schecher . // Jtem als wir mit der procession vß disser Capel giengen funden wir zwen steyn . eyn wiß . der ander rot . ligende . den eynen an dem ende do jhe
- F206-041r,24 sus sant marie magdalene nach syner vfferstennung erscheyn . yn gestalt eynes gartnerß . An den ende deß andern steyns stün sye sant maria mag
- F206-041r,25 dalena do sye mit yrem eygen namen von jhesu berufft . Maria sprach Raboni 7c . Do ist aber ablaß . vij . jar vnd . vij . karen . // Jtem von dannen fur gande mit der procession kamen wir in eyn an
- F206-041r,26 dere capell yn eyn velßen gebuwet . nur eyn altar habende . do ist die stat do vnser herr jhesus ynn was blyben vß gefuoret crutziget zuo werden . biß daz das crütz bereytet ward . Do ist aber der vorig ablaß . // Jtem nahe daby ist eyn ander cleyn capel mit eym altar an dem end erbüwen . do die crutziger cristi vnsers herrn syne kleyder vß teyleten vn
- F206-041r,27 der sich . vnd vmb das eyn loßten welchem eß gantz blybend wurde . do ist aber der vorig ablaß . // Jtem von dannen giengen wir ab dryßig steyne staffeln . in eyn an

- F206-041r,28 dere Capell zuo sant Helena genant . do sye ye andechtig gebett teglich vollenbracht . eyn zyt da blybend nach vindung deß heyiligen crutz . An welchem ende auch das heilig crutz ward gefnnden . do was ettwan ab
- F206-041r,29 laß . vij . jar vnd . vij . karen . Aber der babst Sixtus der vierd des namens hatt dar gelegt vnd geben volle vergebung aller sunden . Doch muß man von disser ytz bestumpten capellen baß ab geen by . xj . staffeln . dan komet man an das end eygentlichen . eyn spelunck . xxij . schw lang . do das crutz . sper . negel vnd dornecron vnsers herren wurden gefunden jm jar von der zyt synes lidens vnd sterbens dryhundert vnd suoben . Do ist aber volle vergebung aller sunden . // Vß disser hoelen wider vff stygende wir kamen mit der procession zuo eym altar yn dem tempel . vnder welchem altar ist eyn steyn . stand als eyn sule . vff welchem steyn vnser herre ihesus saß do er ward gekronet mit dem dornecron . auch sust verspottet . verspyhet . geslagen vnd groß
- F206-041r,30 lichen eteret als dan der passion vß wyset . do ist auch ablaß . vij . iar vnd vij . karen . // Jtem von danen giengen wir mit der procession vffwertz achtzehen staffeln vff den berg Caluarie do vnser herr gecruzigt ward do ist eyn schone gewelbete capel . vnd brynen darynne . xj . ampelen all
- F206-041r,31 zyt vmbwegen wurde vnd heyliket derren statt . // Do ist auch das loch yn eym velßen daryn das crutz gesencket ward welches loch dry spannen dieff ist . vnd eyner spanen breyt . vnd ist mitt eynem kuopffern blech vmbgeben . vmbwegen daz nyeman davon etwas neme oder ettwere . // Do ist by suoben spannen wyte von den lincken arm cristi als er am crutz hienge . eyn grosser ryß ym velßen . also daz eyn mensch daryn mag geleget werden . welcher ryß durch den gantzen velßen biß vnden yn die erd geschahe zuo der zyt do vnser herre jhesus am crutz verschiede . von welchem end eyn wenig darvnder . stunden maria gottes muoter sanctus johannes maria magdalena . vnd ander andechtig frau
- F206-041v,01 wen zuo der zyt des lydens vnsers herren . do ist vol vergebung aller sund . // Jtem vnder dem berg Caluarie zuo der lincken handt ist eyn andere capell . in der ere der jungfrauwen marie vnd sancti johannis gewyhet an der statt golgatha eygentlich genant . doselbet sehet man gar offen
- F206-041v,02 bar den ryß des velsen gende von oben an biß vnden durch den velßen An disser statt ist auch das haubt vnsers ersten vatters Adam gefun
- F206-041v,03 den worden . do ist ablaß . vij . jar vnd . vij . karen . Vnd man komet mitt der procession nit dahyn . Aber von dem berge Caluarie gett man mit der procession an das end do die jungfrau maria leydig saß . do yr der todt lychnam yres lieben kyndes vom crutz benomen . alsbald vff yren schoß ward gelegt 7c . vnd ist do volle vergebung aller sund . // Zuoletzt giengen wir mit der procession in die Capell des heyiligen grabs cristi von welcher ob vil geschrieben ist . vnd do syn . xvij . ampeln allzyt brynnen . vnd in der cappeln vßwendig dem heyiligen grab dry brynnen lucernen . Do ist volle vergebung aller sund . // Jtem von dannen kamen wir wider in die Capel der jungfrauwen Marie da wir mit der procession zuoerst vß gangen waren . also daz die procession da sich endet do sie eyn anfang hette // Nach vollendung der procession assz vnd dranck eyn yeder als ym not was . vnd er hette mitt ym in den tempel genomen . vnd gieng die vberig zyt der nacht zuo heyli
- F206-041v,04 gen stetten in dem tempel nach syner begird vnd andacht vnd bichtet . wan nach loblicher gewonheyte . die bilger pflegen das heylig wirdig sa
- F206-041v,05 crament des fronlichnams cristi sobald der tag her geet enpfahen so man vor den pilgren gemeynlich eyn herlich ampt der meß synget vff dem berg Caluarie . vnder welcher sie werden comunicieret . Aber ich mit
- F206-041v,06 sampt andern edelem comuniciereten in der nacht in der cappeln des hei
- F206-041v,07 ligen grabs . // Von dem vßgang vß dem tempel des heyiligen grabs vnd von andern heyiligen stetten ynwendig der statt Jherusalem . SO alle disse ding waren geschehen vnd der . xiiij . tag des mo
- F206-041v,08 neds Julij an brach . slossen die heyden den tempel vff . Als wir dan vß dem tempel giengen wurden vns gezeuget gre
- F206-041v,09 ber cristenlicher konig so vor zyten zuo Jherusalem haben ge
- F206-041v,10 herschet . welche greber gegen mittentag stan jm tempel . mit namen des konigs Melchisedech vnd waldani . Jtem des hertzogs Gotfridi von bullion des ersten konigs zuo Jherusalem . welchem . vij . ander konig on mittel nach volgeten . die all daselbet eerlichen begraben syn . vnd gar billich als die die Jherusalem vnd das heylig land von den handen vnd gewalt der Sarracen durch groß arbeyt vnnd mangfeltig stryt haben vberkomen . vnd wyder bracht der cristenheit . vnd gehandt hab . lxxxvij jar vnd . xix . tag nacheinander biß vff Gwidonem den letzten konig zuo welches zyten Jherusalem vnd das heylig land durch die Sarracen wyder gewonen ward . vnder welcher gewalt eß noch ist . Von dissem handel wirt hienach wyter geschrieben . // Jtem in mitten des chors in dissem tempel ward vnß gezeuget eyn steyn eyn wenig erhebet von der erden eyn ront loch haben by eyner span
- F206-041v,11 nen wyt da sagt man das centrun oder mittel der erden die wir ynwo
- F206-041v,12 nen weßen . // Jtem in dissem tempel syn mancherley nacion mancherley menschen . die yn vnderscheydenlichen orten deß tempels wonen . vnd haben vnder
- F206-041v,13 scheydeliche sytten . geberden vnd gewonheyten auch haltungen gar vn
- F206-041v,14 glich . die sich doch al cristen vermeynen . aber yn warheyt syn sie mit vil yrtungen vnnd ketzeryen verwickelt . dovon hienach volkomenlicher wirt gesaget . // Jtem vor dissem tempel syn dry cappellen . vnder welchen die erst in der ere aller heyligen . die ander sant johans baptiste . die dryt sant Ma

- F206-041v,15 rie magdalene ist gewyhet . vnd yn yglicher ist ablaß . vij . jar vnd . vij . karen . // Jtem by dem tempel hynder dem berg Caluarie wurdet eyn breytter steyn gezeuget vff welchem steyn Abraham syn sun ysaac wolt gott ge
- F206-041v,16 opffert haben . Vnd ist daby eyn gar vberalter oelebaum an welchen abraham vmb sehen sahe eyn bock hangen mit synen horner . den er nam vß geheyß deß engels vnd opffert ynen anstatt synes sunß ysaac . // Nit verr von dannen an der muren deß tempels ward vns gezeuget eyn vermuerter altar darvff melchisedech syn opffer thet . beduthende da
- F206-041v,17 mit daz ettwan hernach durch cristum jhesum vnsern herren . eyn wares opffer an dissem ende solt vollenbracht werden an dem crutz . // Jtem vor dissem tempel by zehen schritten ist eyn steyn gesetzt zuo ey
- F206-041v,18 nem zeychen daz cristus syn crutz tragende vor onmacht an dissem end viel vnder dem crutz vff die erden . vnd nit verr von disser statt by der muren zeuget man eyn andern steyn . welcher noch hutt fuoßstapffen deß bluots cristi fur haltet vnd bewyset . IN dem . xiiij . tag deß moneds Julij heymsuochten wir ander heylig stett zuo jherusalem vor gende vnd bewysende vns die
- F206-041v,19 selben Gardiano mitsampt etlicher syner bruoder . doch horten wir vor eyn meß yn dem Spital sant johans . Also giengen wir durch die lang gaß durch welche cristus vß Pylatus huß biß an die statt syner crutzigung vß gefuoret ward vnd quamen also nach orde
- F206-042r,01 nung zuo hienach beschrieben stetten . // Jtem zuo dem huß der heyligen frauwen Veronice . welches seßthalb hundert schritt stet wyt von pylatus huß . vor welchem huß cristus das bilde syneß angesichtes yn trucket yn yren schleyer . als noch zuo Rom wurdet bewyset . // Jtem von dannen quamen wir zuo deß richen manß huß der yn die helle begraben ist . davon man hatt ym euangelio luce am . xvj . Capitel . // Jtem von danen quamen wir zuo eynem wegscheyd da vil frauwen stunden die vnsern herren jhesum beclagetten vnd beweynetten . als er vß wardt gefuoret zuo dem tod . zuo welchen er auch sprach . Jr tochter von jherusalem nit weynett vber mich sunder vber vch vnd uwer kynder 7c als der passion vß wyset . // Jtem von dannen zuo eyner anderen scheydung da die juodeu Sy
- F206-042r,02 monem Cyreneum gende von dem dorff zwungen daz er jhesu das crutz huolff tragen . // Jtem von dannen an die statt da die jungfrauwe Maria yrem lieben kynde das swer crütz tragende begegnet . an welchem ende sye vor gros
- F206-042r,03 sem leyde ward onmechtig . An demselben ende schaffet sant helena eyn schone kyrch gebuwet werden die doch zuo disser zyt gantz zerstoret vnnd verlassen erschynet . An dem selben ende mag keyn heyde ychteß buwen dnrch gottlich hyndernuß als man glaubet . wan diß oft vnderstanden ist worden vnd erfunden daz keyn buwe da mag verlyben . // Jtem von dannen quamen wir in eyn gaß do eyn steynebogen stat gebuwen vber die straß von eym ende zuo dem anderen reychend . vff wel
- F206-042r,04 chem bogen oder gewelb stan zwen steyn bede wiß vnd breyt . vff welcher eym cristus stund do er zuo dem tod ward verurteylet . vff dem anderen Pylatus do er den sententz des todes vß sprach wyder cristum daz er solt gecruzigt werden . // Jtem von dannen zuo Pylatus huß darynn cristus wardt gegeyßelt gekronet vnd mit vil anderen smacheyten eteret . // Jn diß huß wurdet keyn pilger ynn gelassen dan villicht vß sunderer gnad vnd gunst der heyden vnd das gar heymlichen . Jn welcher maß ich mitsampt mynen edelen mitbruodern durch schencken vnnd gaben wuorden dar ynn gelassen . // Jtem zuo herodes huß daz zuo der lyncken handt von Pylatus huß vff gende stat . dar ynn cristus auch gefuoret . von den juden verclaget . von herodes versmehet . vnd mit eym wissen kleyd an gethon ward . do ist ytz der heyden kynderschul . // Jtem zuo dem huß Symonis leprosi darynn Marie magdalene all yr sund wurden vergeben als lucas schribet am suobenden synes euange
- F206-042r,05 liums . // Von Salomonß tempel . // Jtem von dannen quamen wir an eyn ende da man vßen Salo
- F206-042r,06 mons tempel sehet . mitt rondem werck vnd kriechescher arbeyt erbuwen mit behauwen vnd polyrten oder geebnetten steynen . welcher Tempel sere hoch vnd wyt ist . mit bly bedeckt . Darvff haben die heiden eyn hal
- F206-042r,07 ben mon als ob er were eclipseret das ist verduncket . als so der monn
- F206-042r,08 finsternuß lydet . vnd das haben die sarracen gemeynlichen ym yngang yrer kyrchen oben stan . // Vor dissem tenpel Salomons ist eyn wytt ebe
- F206-042r,09 ner platz mit marmelsteyn besetzt . // Jtem by demselben tempel ist eyn lange schone kyrch . auch eyn bley
- F206-042r,10 tach habende . vor zyten porticus Salomonis genant . aber diewile Jhe
- F206-042r,11 rusalem was vnder gewalt der cristen . entpfeng die selbig kyrch yren namen von maria geheysen der tempel der jungfrau maria . // Die Sarracen haben noch hutt in demselben tempel achthundert am
- F206-042r,12 plen all wegen brynen . aber yn dem vor genanten tempel Salomons suobenhundert . wan auch dieselb kyrch in der groesse Salomons tempel wyt vbertrifft . By dissem tempel hatt der ytzig Soldan disser zyt regneren . eyn nuwe schone kirch gebuwen nach yrem sytten . yn welher ich auch gewesen byn vff sant Praxedis der heiligen jungfrauwen tag . vnd brynen allwegen darynn acht vnd achtzig amplen . vnd ist sere eyn groß kirch . // Jtem vnder der ob genanten kirchen der jungfrawen maria die auch porticus Salomonis heyßet ist gar eyn wunderbarlich vnnd witte ge
- F206-042r,13 buwe vnder der erden . also daz seß hundert pferd geruogenglich muogen da behalten werden .

Dieselbig kirch ynn haben die heyden vnnd lassen dar inn keyn cristen lichtlichen komen . // Jtem die Sarracen halten Salomons tempel in grosser ere . vnd ly

F206-042r,14 den kein vnreynigkeyt darynn . sye gen mit blossen füßen darynn . vnd nennen ynen den heiligen velsen vnd eyn tempel des herren . vnd das vß sollicher vrsach . wann mitten daryn ist eyn kleyner velß mit eym yssin gittir zuo ring vmbgeben . vnd als vns die mamalucken . das ist die ver

F206-042r,15 laugetten cristen sagetten . keyn sarracen oder heyd vermißet sich densel

F206-042r,16 ben velsen ynn eynigen weg zuo nahen . vnd komen doch von verre lan

F206-042r,17 den den velsen andechtiglichen an zuo betten . wan vil gar grosser wunder

F206-042r,18 zeychen leset man vff demselben velsen geschehen syn . // Zuoerst Melchisedech der priester des obersten gotts opffert darvff wyn vnd brott . // Jtem Jacob der patriarch leget dar vff syn haubt vnd entschlief vnd sahe ym schlaff vff dissem velsen ein leytter stan welcher leittr hoehe die hymel beruoret . vnd die engel gotts vff vnd ab stigen daran . // Jtem dauid sahe eyn engel vff dissem velsen stan mit eym vß gezogen oder blossen swert . // Jtem die priester deß tempels haben vor zyten vff dissem velsen die oepffer holocausta genant vollenbracht . welche opffer durch eyn fuer von hymel komende gantz zuo gotts ere wurden verbrant . // Jten Jeremias der prophet nach gemeyner red der juden . hatt die arch deß gedingß gottes wunderbarlichen verslossen in dissen velsen zuo der zyt der babylonischen gefengnuß . vnd sol gesaget haben durch den geist der prophecy . daz disse stat wurd vnerkant belyben so lang biß sich got wurt erbarmen vber syn volck . demnach vermeynen vil dieselbig arch noch syn darynn beslossen . // Jtem vff dissem steyn als man saget ist vnser herr Jhesus geopffert worden yn tempel am viertzigsten tag nach syner geburt . da yne Sy

F206-042r,19 meon der gerecht vnd gotsforchtig entpfing vnd nam in syne arm . // Jtem jhesus zwolffjrig do er zuo jherusalem verlyebe vnwissende syn elter . ward gefunden sitzen vff dissem steyn in mittel der lerer sie hoe

F206-042r,20 rende vnd fragende . vnd darnach als er an vieng predigen nach trissig jaren saß er dick vff dissem steyn dem volck ym tempel predigende . // Von dem tempel Salomonis saget die geschrift gar vil lobsamer ding die nit not syn hye all erzelen vmb kurtz willen . // Von dannen kamen wir zuo sant Stephans port zuo welcher er gefuo

F206-042r,21 ret . vnverr davon ward versteyniget . Doselbet sehet man noch die stat do sanctus Paulus dazumal Saulus genant stuon . do die juden sant stephan versteynigende syne kleyder ym bevalhen zuo verwaren . // Jtem doselbet ward vns die guldin port gezeuget . durch welche vn

F206-042r,22 ser herr jhesus am palntag vff eym esel sytzende ynn reyde zuo jherusa

F206-042r,23 lem . Zuo derselben porten laßt man keynen cristen nahe gan . Aber wel

F206-042r,24 cher dieselb sehend von disser verre dar wider bettet erlanget aller syner sund volle vergebung . // Von den Maroniten vnd yrem wyderker zuo der romschen kirchen . EYn ander geslecht wonet vnder dem berg libano yn der pro

F206-042r,25 uintz phenicia . nit verr von der statt Biblum geheysen . yn eyner grossen mechtigen zall oder menge . vnd syn dieselben luth gar wol geschicket zum strydt . vnd bruchen bogen vnd ander were 7c . Vnd heyssen Maronite von eynem ketzer Maron genant . welcher saget vnd leret daz nit mee dan eyn will yn cristo vnd vßwurckung wer gewesen . darynne nach uolgende den ketzer machario der dise yrtum erstlich ervand die doch ym sechsten concilio zuo Constantinopel gehalten ist verdammet worden . Dise maronite dieselb ketzery haltende wol by funff hundert jaren . wurden von gemeynschafft der cristen vß gesunderet durch den band . Aber durch gottes gnad sich erkennende . geyrret haben verliessen vnd versworen sie dieselb ketzery vnd theten wyder gehorsam der roemschen kyrchen yn die hende eyns patriarchen zuo Anthiochia Eme

F206-042r,26 ricus genant . Vnd also wurden sie wyder bekeret zuo eynikeit deß cristen

F206-042r,27 lichen glaubens . Demnach so all ander bischoff vnd prelaten anderer nacionen yn den landen nitt tragen bischoffhuoth oder ryng oder steb . auch nit gebruch haben der glocken . so syn die maronite vns yn sollichen glichformig . als auch yn den gottlichen ampten vnd sacramenten . Dar vmb yr patriarch was yn dem concilio zuo rom gehalten vnder den babst Jnnocencio dem dritten deß namens gegenwirtig zuo gelassen on wyderrede . doch hatt eß ytz eyn andere gestalt vmb sie . Dise maronite wonen nit stettes zuo jherusalem . aber dick wallen sie dohyn vß andacht vnd liebe zuo den heiligen stetten . besunder wan groß hochzyt oder fest syn vnnd haben auch keyn eygene sprach . sunder sie bruchen die Chaldeysch oder sarracenisch . // Hye volget nach eyn vßgang oder zuosatz eyner notturfft

F206-042r,28 gen vnd tapfferen disputacion wyder eyn swere yrtum . Das nit vrsach halb derren mancherleyen secten vnd nacionen oder glauben ja baß yrrungen so wir hievor haben erzelet nach

F206-042r,29 eynander . oder vß ander vrsach wie sich die begeben mocht . yman yn dise yrtum valle . daz er glaubet eyn yeden yn synem glauben gesatz oder sect mogen selig werden . besunder so er nit zwyffelt ja vestig

F206-042r,30 lichen haltet daz syn glaub gesatz oder sect . guot sy vnd gotgeuellig was er thuot . vnd vmb gotts willen thuot was er thuot 7c . So beduncket mich nott vnd nutz syn wyder solliche schedliche yrtum nach den kurtzsten hyer zuo setzen das daz die heyiligen lerer darwyder schriben . damit daz wir wyder sollich todlich gyfft das villicht yeman vß vor geschriben sa

F206-042r,31 chen mocht entpfahen eyn heylsame ertzeny so verr yn vns ist fursich

F206-042r,32 tiglichen geben . // Eß ist wol kundt vnd wissen allen cristenmenschen . daz sancti Pauli gezugnuß nach . ist alleyn eyn glaub . eyn gott . vnd ein tauff . Vnd derselb vnser war glaub ist allein eynig vß dem grund . wan das

davon der glaub furnemlich ist oder das deß glaubens gegenwurff ist . ist eynig . das ist gott . darzuo die vrsach vnder der wir alle ding . vn

F206-042r,33 der dem glauben begriffen . glauben . ist eynzyg . das ist die gottlich vnd oeberste warheyt . darvff sich vnser glaub allermeist leynt . darzuo ist der glaub ein liecht von oben herab dem menschen yn gossen . das ist von got vnd ist nit ein grund habende von glaubhaftikeyt derren ding die man glaubet . demnach der glaub nit wurd vß geteylet oder gemangelt

F206-042r,34 get nach mangeltikeyt derselben ding die man glaubet // Noch mee ist alleyn der cristen glaub allein war . welches man yn vil weg mocht be

F206-042r,35 wysen vnd an zeugen . Als vß vestigung oder bestetigung deß glaubens ge

F206-042r,36 schehen durch onzall vil zeychen . oder durch bystandt vnd gezugnuß on zall vil heiliger vnd wyser menschen die vmb deß glaubes willen syn ge

F206-042r,37 storben . oder vß vil offenbarung vnd gewyß prophecy gethan . den glau

F206-042r,38 ben zuo fundieren oder beschyrmten . auch darvß daz vnser glaub anders nit dan wirdige ding gott an treffende yn haltet . vnd auch von dem men

F206-042r,39 schen nit anders saget dan was ein vernunftige creatur wol zymet . vnd zuolettst vß den nachuolg den das volck hatt gehebt . das den waren glau

F206-042r,40 ben hatt gehalten diewile eß nach demselben hatt gelebet . wan eß ym dieselb zyt allwegen wol ist gangen . vnd vß straff vnd plag deßselben volcks wan eß den glauben hatt verlassen . Aber dise ding(das ist eyni

F206-042r,41 keyt vnd warheyt vnsers glaubens) ytz zuomal vor war gehalten . vnd deßhalb vnderwegen gelassen wan sie wol kundt syn . were gar leicht diser yrtum engegen zuo komen . als yn der gestalt . Jst alleyn eyn eyni

F206-042r,42 ger warer glaub . als eß dan ist . so volget von not das hervß . daz alle die die eyn andern glauben oder sect haben . yrrten . demnach nit besteen mag daz eyn yeder yn syner sect . gesatz . oder glauben der nit glichformig ist den eynigen waren glauben . moge selig werden . Eß ist auch keyn ander glaub vff erden . yn dem man gott glaube . vnd der deß names wirdig sy daz er warlich eyn glaub geheissen moge werden . vß genomen alleyn vn

F206-042v,01 sern glauben . eß wurt auch got nit geeret yn keynen andern glauben dan yn dem vnsern . eß ist auch keyn tuogent vßwendig vnserm glauben . der alleyn ein fundament ist vnd anfang aller tuogen vnd geistlikeyt yn di

F206-042v,02 sem leben . als auch syn vßwurckung die erste ist yn guoten wercken . vnd syn dienst der erst yn gottsdienst . als auch die verstandtnuß oder ver

F206-042v,03 nunfft die erst ist vnder den obern krefftten der selen . welcher vernunft der glaub eyn volbringung ist . Dem allem nach ist diß kundt daz man yn andern glauben gott nit dienet vnd nit eret 7c . wan keyn ander glaub deß namens wirdig ist . vß dem grund . wan alleyn eyn eyniger warer glaub ist . nemlich der cristenlich glaub . // Furhyn ist zuo mercken wo

F206-042v,04 her die yrtum vrsprunglichen kome . als ettlich meynen . eyn yeden mo

F206-042v,05 gen yn synem glauben behalten werden 7c . Jst zuo wissen daz deßselben disses eyn grosse vrsach ist . das ist die groß zall der verdampften vnd der

F206-042v,06 ren die noch verdampft sollen werden . vnd wenig oder kleyn zall der se

F206-042v,07 ligen oder derren die noch sollen selig werden . daz ettlich gar vbel vff nemen vnd sie vnbillich beduncket . darvmb sie vermeynen daz ein yeder yn synem glauben moge selig werden . Wan sie also arguiren . wie mocht

F206-042v,08 te die vnhermessen barmhertzikeyt gottes so wenig erwelet haben zuo se

F206-042v,09 likeyt . vnd so vil verlassen zuo ewiger verdamnuiß . allermeist gemercket . daz ye auch nach cristenlicher warheyt gott geneygter ist den menschen zuo behalten dan zuo verdammen . oder zum mynsten nit mynner ist syn barmhertzikeit zuo erbarmung . dan syn gerechtikeit zuo rach oder straff . Vß welchem grund sie wollen beslissen daz zuo glauben sy vß der grundlosi

F206-042v,10 keyt der gottlichen guote vnd barmhertzikeit . daz ein yeder yn synem glau

F206-042v,11 ben . gesatz . oder sect . moge selig werden . wan er haltet daz die selb sect oder glaub recht sy . vnd gottgeuellig 7c . wie ob gesatzet ist ym anfang . // Noch mee arguiren sie vnd beduncket sie gar ein große vermessenheit syn daz allein die cristenmenschen . der wenig ist . gegen andern gerechnet sich vermeynen selig sollen werden . vnd all ander mangeltig schar der menschen . das ist der boesen cristen . derren auch mee syn dan der guoten . darnach aller juden . aller sarracenen oder heyden solle verdampft wer

F206-042v,12 den . Mee hynzuo sagende vnd sprechende . wie mage das groß hymelsch huß gottes erfullet werden mit so wennigen vßerweletten . so doch die helle . die vil kleynere ist dan der oberst hymel . mag ein sollich groß men

F206-042v,13 ge der verdampften entpfahen vnd yn halten . oder ist dan geburlich dem konig aller konig vnd dem herren aller welt daz er vil mee habe gefang

F206-042v,14 ner vnd vil mee der erhengten an galgen oder gerederten 7c . dan derren die ym dienen vnd ym vnderworffen syen . Oder mag die barmhertzikeit gottes die keyn zall oder meß hatt . lyden sollich pyn vnd straff vnd metz

F206-042v,15 gery oder fleischhackery 7c . Oder worzuo hatt got geschaffen eyn sollich menge der verdampften oder aller so noch verdampft sollen werden . Vnd ob er sie hett geschaffen zuo ewigem tode . ob daz gebure der richtum

syner guote daz er sie hab geschaffen . die er doch wol mocht selig machen vnd doch yn hellische flam verlasset 7c . Jtem sie fragen auch derrenhalb die vmb gots willen thuon was sie thuon . vnd meynen sie thuon ym ein dienst darynn . wiewol sie vnrecht thuon . thuon sie eß doch vnwissentlich . was wurd geschehen . deßglichen derrenhalb die vmb gots willen pyn vnd marter lyden . nitt alleyn gedultiglichen sunder auch frolichen . als vil ketzer haben gethan vnd noch thuon . die sich lassen verbrenen vnd mey

F206-042v,16 nen sie haben recht vnd sterben darvff 7c . // Darvff zuo antworten sprechen wir daz dyse yrtum ist vil menschen gar schedlich vnd ein vrsach yrer verdampnuß vnd sagen also hynzuo . Wan eyner lyplichen wolte wandelen vnnd wolte nitt fur sehen sol

F206-042v,17 lich schaden oder verderblikeyten deß wegs die doch mochten fur gesehen werden . sunder er wolte mit beslossen augen oder von dem weg ab gewen

F206-042v,18 det geen . was ym vbels oder schaden begegnet . wem wurde eß billicher zuo geleyet dan ym selber . wan er hette mogen sollich vbel oder vall my

F206-042v,19 den oder ab wichen . hette er syn augen vff gethan . oder nit gekeret von den weg . Deßglichen ob eyner wolte gen an ein ende oder zuo einer statt nit wissende den weg der da hyn fuoret . aber er funde eynen der geneygt vnd willig were ym den weg zuo zeugen vnnd auch ynen geleyten . aber diser wolte der keynes begern oder haben . wann er darnach yrr gende wurd . wem wurde das billicher zuo geleyet dan ym selber . Dise bede ytz gesag

F206-042v,20 ten proposicion oder rede sobald sie gehoret werden muß eyn yettlicher mensch der do vernunfft brucht glauben vnd zuo lassen . Noch vil mee hatt eß sich also yn dem weg der sytten . dan ynn dem lyplichen weg . so vil mee ein yeder mensch mag mit eygem geistlichem vnd darzuo fremb

F206-042v,21 dem gesiecht geystlich schaden oder verderblikeyten fur sehen dan zytt

F206-042v,22 lichen . demnach welcher mensch sollich geistlich schaden vnd vbel nitt wil wychen oder vermyden . durch eygen geistlich gesicht oder frembdes so eß ym bereydt ist . leget eß billich ym selber zuo so er dar yn vallet dan yeman anderem . Jtem sehes tu ein andern menschen yrren vff dem lyp

F206-042v,23 lichen weg . so bist u schuldig ynen zuo wysen vff den rechten weg das er nit yrr gang . vnd nit yn vbel vall . also vnd noch vil mee vff dem weg der sytten . ist das zuo thuon gegen eym yeden . Aber vil mee ist eyner yeder mensch ym selber schuldig sollichs zuo thuon vnd ym zuo rathen dan eym andern . so vil mee ein mensch schuldig ist sich selber lieb zuo haben dan eyn andern . // Vß welchem diß volget . daz die versumlikeyt zuo suchen den weg der warheyt vnd deß heylß . ist gar sundtlich vnnd verderblich . auch werdt ewiger verdampnuß yn denen menschen die eygen synn . ver

F206-042v,24 nunfft vnd kluockheyt . geistlich schaden vnd vbel hetten mogen fur sehen oder frembd gehilff nit haben wollen bruchen vß der geschrift . predigen exempeln oder zeychen 7c . Vnd ist billich als sanctus Paulus spricht daz eyn sollicher yrender oder vnwissender mensch werde auch nitt ge

F206-042v,25 wysset oder erkennet von got . das syn die menschen von denen dauid spricht Sie wollen nit wissen daz sie wol thuon 7c . // Ob aber yeman freget deß menschen halb . der do funde lerer oder prediger wyder ein ander syn . ey

F206-042v,26 nen glaubig den andern vnglaubig oder ketzer . vnd er kuonnet doch nitt vß eygener vernunfft oder vß yrer lere oder leben sich berichten vnd erken

F206-042v,27 nen welchem er solte glauben . ob gott von ym vorderet daz er muß wis

F206-042v,28 sen welchem er glauben soll . Jst dise antwort daz eyn sollicher so er nit hatt vß menschlicher vernunfft waz ym zuo thuon sy . ist schuldig vnd soll gottlich hilff an ruoffen vnd begeren als sanctus Augustinus spricht . vnd mit gantzem ernst bitten daz got der erluchter der hertzen . ym wolle zey

F206-042v,29 gen vnd wysen den weg der warheyt . vnd syn vernunfft vnd hertz zuo ney

F206-042v,30 gen vnd zuo fuogen dem teyl daz war ist vnd yn angenehme . Vnd dan ist zuo glauben vngezwiffelt an der barmhertzikeit gottes . daz er eym sol

F206-042v,31 lichen an klopfenden menschen wurde vff thuon die thuor der warheit . vnd syn hertz wurde verhuoten daz eß nit wurde yrren oder zuo hülnden der yr

F206-042v,32 rung . besunder so keyn versumlikeit erschynt yn gesuoch . der warheit oder keyn ander sunde da nit hynderet . Wan ye gott die menschen verhuotet die ynen lieb haben als dauid spricht . vnd beschyrmnet die menschen die do eynfeltiglichen leben als der wyß redt ym buoch der spruchen . Wir sagen auch hynzuo . daz sittemal menschlich vernunfft geschaffen ist . die heylsam warheyt zuo suochen vnd erkennen . so ist sie schuldig grossen vlyß vnd sorg darzuo an zuo keren . vnd wo sie das nit thete so wer sollich ver

F206-042v,33 sumlikeyt gar schedlich vnd sundtlich . Jtem eß ist kundt vnd offenbar daz vnser vernunfft schneller ist vnd fertiger gott zuo suchen vnd zuo fynden als vil sie das schuldig ist zuo thuon . dan ettwas anders . besunder gemer

F206-042v,34 cket daz gott geneygt vnd willig ist sich zuo offenbaren vnd zuo helffen al

F206-042v,35 len denen die yn suchen . vnd nahet sich allen denen die sich zuo ym nahen . Welches alles wol verstanden . mag ein yeder mensch wol mercken daz alle die . die do yrren ym weg der warheyt vß eyner eynigen oder glichen vrsach vnd schuld yrren . daz ist dise daz sie versumlich syn durch sich selbst zuo erforschen die warheit oder zuo fragen von andern . oder gottlich hilff an zuo ruoffen vnd begeren . oder yndem daz sie die warheyt nit thuon . wan

welcher nit thuot daz guot das er weyß zuo thuon . der ist nit wirdig zuo ent

F206-042v,36 pfahen erkandtnuß sollichs zuo thuon daz er noch nitt weyß . Jtem eß ist zuo hoffen von eym yeden menschen daz wann er syn vernunft bruchet mit gantzem vlyß yn denen dingen die er selber mag verstan daz yme durch gottlich offenbarung oder ynsprechung syn vernunft werde er

F206-042v,37 luchtet zuo erkennen die ding die er durch eygene vernunft nitt mochte erkennen oder daz ym sust werde verkundet daz zuo synem heyl ym nott ist Als dem geistlichen man Cornelio eym heideschen amptman gescha

F206-042v,38 he zuo dem sant Peter gesandt ward der ynen mitsampt allem synem ge

F206-042v,39 synde zum cristenglauben bekeret . als man lyset yn dem buoch der werck der aposteln am . x . capitel . Darvmb sagen wir daz ob eyn mensch gantz allein were verr von allen menschen vnd gebruchet sich syner vernunft nach dem besten . vß erkantnuß siechtbarlicher creatur mocht er erkennen den schoepffer vnd vil anders von ym . als das derselb so er der oberst ist vnd das hochste guot were zuo eren . zuo lieben vnd an zuo betten fur all crea

F206-042v,40 tur 7c . Vnd so er sollichs erfunde vß der creatur . wurde ym gott durch eygen ynsprechung oder durch engelsch oder menschlich vnderwysung vnd lere vil ander ding geben zuo uerstan . wann ye das zuo glauben ist . daz gott nyeman wolle verlassen der ym vlyssiglichen an hanget . vnd also ist clar vnd offenbar vß ytz gesagten vrsachen daz die verdamnüß billich vnd recht ist derren menschen die sollichs nitt thun daz sie solten vnd thuon mochten damit daz sie zuo dem weg der warheit vnd deß heyls koemen . // Daz sie aber fragen von der grossen menge der verdampften worzuo sie gott hab erschaffen . ist diß eyn gemeyner besloß der lerer . daz gott vß grosser richtum syner guote hatt die menschen erschaffen . vnnd hatt denen vil guots bewyset . aber pyn oder straff hatt er nye keynen men

F206-042v,41 schen zuo gefuget vnd wurd auch numer zuo fugen der mensch hab eß dan wol verdient . Daz aber so vil syn derren die verdammet werden . vnd so wenig derren die do selig werden . deß haben wir eyn grosse glichnuß yn naturlichen vnd auch yn sittlichen dingen . wan allwegen grosser men

F206-043r,01 ge ist der schnoden vnd vnedelen ding dan der koserlichen vnd edelen als mee bly vnd yßen ist dan golt vnd silber . vnd mee gemeiner grober steyn dan edelgesteyn . auch mee eychenbaum vnd thenneholtz dan ce

F206-043r,02 dar oder palmenbaum . als auch vil mee syn der toechten menschen dan der wysen . vnnd vil mee der bosen dan der guoten . Ja als der wyß spricht . die zall der thoren ist on end groß . Jtem wir sehen daz gott vn

F206-043r,03 der der grossen zall der menschen wenig verhenget keyser oder konig auch zyttlichen werden vber die kleynen vnnd schnoden konigrich diser welt die do bald zergeen vnd wir verwundern vns deß nitt . wievil mee soll vns nitt wunder nemen ob gott wenigen menschen verlyhe syne hym

F206-043r,04 mellische grosse mechtige vnd ewige rich zuo erlangen . // Jtem sehes tu von hundert menschen nüne vnd nuntzig mitt gantzem vlyß vnd vß allen krefftten lauffen eyn weg der do furet zum tode . vnd nit mee dan eynen lauffen eyn weg der do fuoret zum leben so befremb

F206-043r,05 det dich nit daz die andern all yn todt vallen oder sterben vnd der allein belybet leben . Also so du syhest eyn sollich groß scharr der menschen ylen vnd lauffen zuo dem ewigen tod durch die sunde . vnd so wenig zuo dem ewigen leben durch die tuogende . Soll dich nit befrembden daz ein yeder das end erlang vnd begriffe darzuo er mit gantzem vlyß vnd vß allen krefftten ylet vnnd lauffet . Dem allem nach daz gott eyn sollich grosse menge hatt geschaffen derren menschen die er fur gesehen hat verdampft sollen werden solt u dich verwunderen syner gottlichen guote daz er den

F206-043r,06 selben menschen so vil guots hatt bewiesen vnd gethan . so er doch wol er

F206-043r,07 kandt hatt daz sie ym vndanckber wurden syn . Darzuo verwunder dich der boßheyt der menschen die den mylten richen geber aller guoter gott . mit synen eygen gaben erzornen vnd wyderstritten . Vnd bedenck also die barmhertzikeyt gottes . daz du daby syner gerechtikeyt auch nit ver

F206-043r,08 gessest . welche gerechtikeyt die menschen die barmhertzikeyt schaffet . spyset . regieret . vnd vffenthaltet . so sie sollichen guotthaten vndanck

F206-043r,09 ber syn . billichen verdammet . Vnd was ist wunder daz die gerechtikeyt gottes den sundern wydergyldt daz sie verdient haben . Du verwun

F206-043r,10 derst dich nit daz die suonnn luchtet . vnnd das fuwer hytziget . vnd daz die barmhertzikeyt gottes den menschen vil guots zuo fuget . So laß dich auch nit wunder nemen daz die gerechtikeyt gottes die menschen straffe . die gott wyderspennig vnd vnghehorsam syn . vnd synen guotthaten vndanck

F206-043r,11 ber . wan was eyn yettlicher seydet das wurd er ab schnyden . als sanctus Paulus spricht Ad Galathas am . vj . capitel . Syn wir guott eß blybet nit vnbelonet . syn wir aber boß eß blybet auch nitt vngestraftet . Wann als der wyß redt . gott hatt den menschen von anbegyn recht vnd guott geschaffen vnd hatt yn verlassen yn gewalt synes raths vnd hatt yme fur gesatzt wasser vnd fuwer . das leben vnd den todt . guots vnd boß . vff das daz er erwelete welches er wolte . // Daz sie darnach fragen warvmb gott lyde sollich verderbung der menschen die er geschaffen hatt . oder was lustes er habe yn yrer ewiger verdamnüß . Sagen wir daz eygetlichen gott das hochst guot nichts vß

F206-043r,12 wennig ym selb er erlustiget . aber die pyn vnd straff der bosen erlustiget ynen sovil sie allzytt guot ist vnd erzeugen syne gerechtikeyt . die daryn auch zuo loben ist . darvmb sich auch die seligen ym vatterland derselben straff sovil mee werden frewen sovil mee sie die gerechtikeyt gottes wer

F206-043r,13 den lieben vnd erkennen . als dauid spricht . der gerecht wurd sich frewen so er wurd sehen den

rach gottes an denen verdampften vnd wurd syn hende weschen ym bluodt deß sunderß . // Vß allem disem daz wir ytz gesaget haben soll kundt syn eym yeden menschen das die gottlich guote großlich zuo loben ist . yndem daz er den boesen vnd sundtlichen menschen . on das wesen vnd leben vnd ander na

F206-043r,14 turlich guoter . verlyhet auch gnadriche vnd zyttliche guoter . Daz aber er ynen nit mee gybet . ist nit darvmb . daz er die handt syner myltikeit ynen entzyhe . sunder darvmb daz sie yr hende nit dar wollen reychen . oder die

F206-043r,15 selben mit andern sachen bekumeren . demnach eß recht vnnd billich ist daz sie sovil myner entpfahen von gott . sovil sie sich wenden vnd ab ke

F206-043r,16 ren von ym . als . daz die sunn nitt all menschen beluchtet . ist nit schuld der sunnen die yren glantz nyman enzucht . sunder derren schuld die sich von yrem liecht verbergen . Ob noch yeman vberlesende dise vor gende materig von manch

F206-043r,17 erley secten vnd nacionen sagende 7c . begeret zuo wissen vrsa

F206-043r,18 chen wuohere sovil yrthum syen etsprungen vnd komen . wie

F206-043r,19 wol sollich vß dem daz hyevor gesagt ist mag vermercket werden . doch damitt daz baß kundtbar werde ist zuo wissen . daz die erste vnd groste vrsach aller yrrung ist die sunde der versumlikeyt als die menschen die warheyt vnd gottlich hilff nit suochen oder auch eyn yede an

F206-043r,20 dere grosse sund die gottlicher gnaden den weg versluoset daz sie den men

F206-043r,21 schen nit mag erluchten . wan gar billich vnnd nach rechtem vrteyl soll der mensch gottes hilff beraubt werden der deßselben nitt begeret oder nit suochet . auch gar billich soll der glantz der ewigen sunnen nit erluch

F206-043r,22 ten das huß deß menschen der all fenster vnd thuor demselben gotlichen liecht beslußt . Nun ist der recht war glaub nitt vß vnser natur . sunder eyn gnadrich gab gottes als sant Paulus spricht ad Ephesios am an

F206-043r,23 dern capitel . wan wer der glaub naturlich . so wer er glich by allen men

F206-043r,24 schen . vnd were nit sollich zwytracht yn der welt als ytz ist . darvmb der glaub von gott ist zuo begeren . darvmb auch eyner zuo cristo sprach . als man lyset mathei am . ix . capitel . Herr hilff myner vngleubikeyt . Als man nun die sunn nit mag sehen dan durch yr liecht . als auch gott nitt dan durch das liecht syner gnaden . so aber vil demselben liecht wyder

F206-043r,25 spennig syn . darvmb blyben sie auch blyndt vnd mogen gott nit sehen oder erkennen . darvmb sie von nott yrren . // Die ander vrsach ist dise daz die menschen sich selber keren zuo der falscheyt vnd yr vernunfft ab

F206-043r,26 wenden von der warheyt vnnd von den dingen die man glauben soll . auch von den sachen die do mochten den menschen yn fuoren zum glau

F206-043r,27 ben . Als dan die menschen thuon die yr secten oder gesetzen oder haltun gen also mit eygener liebe vmbvahn . das sie von anderm das darwy

F206-043r,28 der ist nit mogen gedencken oder horeen sagen . darvmb sie yn yr yrtum müssen blyben als dan all sarraceni syn . auch andere nacionen ob bestun

F206-043r,29 met die zuo vil hardt yren eygen secten oder sytten oder ketzeryen an han gen . vnd ynen nit darwyder lassen predigen oder sagen . wan sie zuo styff vff yrem eygen synn stan . // Jst auch eyn andere vrsach sollicher yrrung yn der welt . besunder die thorheyt derren menschen die durch natuerlich vernunfft wollen verstan daz man mitt derselben nitt mag begriffen eben als do eyner mit menschlichem gesiecht woelt sehen daz eyn adeler mit synem scharpffen gesicht kumm mag gesehen . als dan die menschen thuon die mit yrer vernunfft alle ding wollen begriffen . vnd was sie do

F206-043r,30 mit nit verstanen . meynen sie nit yn der natur wesen . darvmb sie dick yrren . Damit sy gnung von diser materyg gesaget mit eym vßgang vß der andern materig die ich nun wyder wil volfuoren . // Von den latinischen cristen derren auch eyn teyl zuo Jherusalem syn . NACH dem vßgang(hoff ich nit vnnutzlich hyr yn gesetzet) steet vß von der letzten nacion daz ist der latinischen auch eyn klein wenig zuo sagen . Vnd ist zuo wissen daz on ander na

F206-043r,31 cionen hie ob erzelet die sich all cristen vermeynen vnd doch nit warlich syn . syn ettlich ander war cristen vnd geistlich person doselbet . welche von den andern nacionen geheysen werden latini als sie auch syn . aber von den sarracenen Frantzchi . wan sie bruoder syn sancti Francisci von vns aber gemeynlichen mynnerbruder oder barfußen genennet . dieselben werden von yren obern da hyn gesendet . vnd wan ettlich ster

F206-043r,32 ben oder sust verenderet werden . schicket man ander an yr statt . vnd die leben vnder der obseruantz yreß ordens von dem almuosen der andech

F206-043r,33 tigen pilger die zuo zytten von cristenlichen landen da hyn komen . auch von hilff vnd stuer ettlicher cristenlicher fursten die vß andacht zuo den heiligen stetten zuo Jherusalem yr almuosen jerlichen da hyn schicken . Item dieselben bruoder enpfahen die pilger die zuozytten da hyn komen gar fruntlich vnd gen mit ynen zuo den heiligen stetten vnd syn ynen dienstbar nach yrem vermoegen yn vil sachen . // Item dieselben bruoder haben zuo jherusalem eyn closter vff dem berg Syon vnd gemeynlich . xxiiij . bruder darynne gott dienende . Nit verr von dannen haben sie auch vnder yr sorg vnd versehung eyn conuentlyn der armen frauwen sancte clare genant . vnd gemeynlich sechß swester dar

F206-043r,34 ynne . darzuo haben sie vnder yr sorg den tempel der jungfrauwen Ma

F206-043r,35 ria zuo Bethleem vnd ein conuent doselbet mit sechß bruodern yres ordens die das heilig krupfflyn

vnsers herrn verhüten vnd eren . // Jtem sie haben allwegen zwen bruoder yres ordens yn dem tempel deß heiligen grabs welche sie auch dick endern vnd ye ander vnd ander an yr statt ordenen . // Jtem allen disen ytz genanten stetten vnd personen müssen dieselben bruoder von dem berg Syon mit allen notturfftigen dingen versehen . als die kyrchen mitt brynnenden ampelen beluchten . vnd sust mit anderm gezyrde . vnd darzuo yn buw vnd wesen halten die kyrchen vnd conuent . vnd die personen mit essen vnd trincken vnd kley

F206-043v,01 dung 7c . Vnd wiewol sie sich geistlichen vnd ersamglichen halten vn

F206-043v,02 der den sarracenen . vnd auch ob genanten nacionen . noch dan müssen sye vil spott vnd smacheyt von ynen lyden . auch groß beswerung von den heyden die sie dick vnd oft vberuallen . denen auch sie essen vnd trincken muossen geben vnd das mit teylen deß sie baß bedorffen . Jst auch diß zuo wissen zuolettst daz nach mynem beduncken weren die

F206-043v,03 selben bruoder nitt zuo Jherusalem . mochten wir latinischen gar vbel zuo

F206-043v,04 gang haben zuo den heiligen stetten . wan vns die andern nacionen vnd besunder die verlaugnetten cristen mamalucken geheysen . seer hassen vnd vns sollich dienst numer theten als dise bruder thuon . von welchen brude

F206-043v,05 ren vil anders schriben so villicht nit vnbequemlich were brich ich vmb kurtz wegen ab . Aber erlaub nyme ich von allen den die diß werden le

F206-043v,06 sen zuo beweynen hye vnd beclagen dieselb heilig statt Jherusalem mitt

F206-043v,07 sampt dem an stossenden lande . zum ersten . darnach auch das gantz orient do ettwann der cristenliche glaub so loblich vnnd ynnbrunstig ist gewesen . vnnd zuolettst auch den elenden statt vnser latinischen kyr

F206-043v,08 chen yn occident . welches alles yn guoter meynung vff das kurtzst ich wil vberlauffen . // Eyn kurtze clag vber das heilig land besunder Jherusalem . SO dise ding ob beschriben zuo hertzen werden genommen vnd also yn gemuot vervasset als eß dan billich ist . welcher an

F206-043v,09 dechtiger frund vnd liebhaber . gottes vnnd deß cristenliches glaubens . mag sich enthalten . daz er nit schry vnd weyn . Ja mit Jeremia begere von gott . daz synem haubt werde wasser geben . vnd synem augen ein brun der zehern damit er tag vnnd nacht beclage die verwuostung vnd verlassung der heiligen statt Jherusalem . der statt deß grossen konigs vnd deß herrn der krefftigen . an gesehen daz nitt alleyn die

F206-043v,10 selb . sunder das wyrdig land zuo ryng darvmb sogar vß gewalt der cristen ist komen . darynne doch vnsers glaubens vnd heyles vrsprung hatt an gefangen . vnd das werck vnser erloesung ist vollenbracht wor

F206-043v,11 den . Ja sogar dasselb land den cristen ettweret ist worden . daz kume viertzig warer cristenmenschen die der heiligen romschen kyrchen gehor

F206-043v,12 sam syen . ym gantzen heiligen land werden gefunden . Aber der andern vngleubigen sarracenen vnd verlaugnetten cristen . vnd derren die der heiligen kyrchen vnghehorsam syn . vnd gantz von yre vß gesunderet . wo

F206-043v,13 net ein grosse menge doselbet . als hievor vil davon ist geschrieben wor

F206-043v,14 den . Demnach wir billichen ersufften solten vnnd groß leydt haben vber all sollich vbel . sunden vnd schanden . so yn mittel Jherusalem . vnd vmbland darvmb geschehen . besunder gemercket . daz das heilig wyr

F206-043v,15 dig land das durch vnsers herren jhesu cristi vnsers erloesers vnd heyl

F206-043v,16 makers geburth . leben . predig . zeychen so hochwirdiglichen gezyeret . auch durch syn bytter lyden todt vnd marter gewirdiget . ja mit synem koserlichem bluodt begossen . vnd mit syner froelichen vfferstennung . vnd herlicher vffarth zuo hymmel . vnnd notturfftiger sendung deß heiligen geystes erluchtet ist worden . also vil jar von der zyt als zuolettst die wa

F206-043v,17 ren cristen darvß vertryben wurden . biß vff dise zytt den verfluochten sarracenen gotteslesterer blybet vnderworffen . vnd sust mit so vil ver

F206-043v,18 laugnetten cristen . ketzern vnd vnghehorsamen erfullet . zuo smach vnd schand deß cristenlichen namens . // Nit alleyn sollichs zuo hertzen geuasset wer eym andechtigen cristen

F206-043v,19 menschen zuo weynen vnd zuo suffzen . sunder auch mit vliß vnd ernst wer got an zuo ruoffen der vatter der barmhertzikeyt . der gott alles trostes . vnnd on vnderlaß zuo bitten daz er sich vber dasselb land vnd das vberig teyl synes erbes sich erbarmet . vnnd syn gnadrich angesicht vber vns vnd dasselb lande wendet . vnnd hyn neme das vngleubig volck von denselben landen . damitt wir syn lob frolicher mochten volbringen . Der heilig prophet Daniel yn babilonischer gefengnuß vorzytten ge

F206-043v,20 setzet . bettet auch weynnende fur dise statt vmbwegen yrer zerstoreung vnd verwuostung derselben . durch die heyden geschehen . also clagende . deß wort auch wir mogen gebruchen mit ym sprechende . O herr wir ha

F206-043v,21 ben gesundet . wir haben vbel gethan . vnd vil schalckeyt bewiesen wyder alle dyne gerechtikeit . Aber wir bitten dich . kere ab dynen zorn von dy

F206-043v,22 ner statt Jherusalem vnd von dynem heiligen berg . wan vmbwegen vn

F206-043v,23 serer sunde vnd bößheyten vnserer eltern Jherusalem vnd das heilig land wurd ytz lang etteret von den heyden vnd vertretten von den hunden vnd geschendet von den vnglaubigen . vns zuo grosser schande . Darvmb O herr erhoree nü vnser gebett vnd erzeug dyn gnadrich angesicht vber die heilig statt die also verlassen ist vnd wuost O herr syhe herab von dy

- F206-043v,24 nem heiligen stull vnd gedenck vnser . O gott neyge durch dich selbs dy
 F206-043v,25 ne oren vnd hore . thuon vff dyne augen vnd syhe vnser ellend vnd betrub
 F206-043v,26 nuß vnd auch dyn heilige statt darvber dyn nam so dick ist an geruooffet worden . wan du bist eyn
 herr aller herrn . vnd ist nyeman der dyner got
 F206-043v,27 lichen maiestat moge wyderstandt thuon . wann yn dynem gewalt alle ding syn gesetzet . vnd yn
 dyner handt syn alle land der welt vnd die her
 F206-043v,28 likeyten aller konigrich . Darvmb O herr eyn konig aller konig erbarm dich nun vber dyn volck .
 wan vnser vynd suchen vns zuo verderben . vnd dyn vberig erbe gantz zuo uerdilcken . O herr nit veracht dyn teyl das du
 dir hast erloeset . sunder biß gnedig vnd barmhertzig dynem loß . damit . daz die vngleubigen nit sprechen wo ist yr
 gott . O herr wir bitten daz der rach deß bluodts dyner diener daz vergossen ist auch dynes edelen bluots werde kundt
 vor vnsern augen an den vngleubigen nacionen da
 F206-043v,29 mit daz wir dyn volck vnd schefflyn dyner weyde . dich vnsern waren gott mogen loben vnd von
 geslecht yn geslecht yn ewikeyt dyn ere ver
 F206-043v,30 kunden Amen . // Eyn ander clag vber das gantz orient . SO aber eyn andechtiger cristenmensch
 syn seelich augen strecket nit alleyn vber jherusalem vnd das an ruorende land . ettwan das gelobt land geheissen . sunder
 auch wytter yn das gantz orient . vyndet er noch mee vrsach hertzlich zuo weynen vnd zuo sufftzen . erkennet daz dasselb
 wytt vnd groß land . ettwan so mit wirdigen kyrchen vnd bystummen gezyeret . ytz sogar verwuostet vnd vertreten
 wurd also(das doch wol kleglich ist) by den versyegen wassern man nitt wol mag mercken wo ettwan der gezychnet brun
 gestanden sy . vnd by den verdorreten stoecken vbel verstanden mag werden wo der schon beslos
 F206-043v,31 sen garth sy gepflantzet gewesen . Jawol ist eß zuo beweynen daz den vß
 F206-043v,32 erweleten wyten vnd schonen wyngarten gottes den er mit syner handt hette gepflantzet die boesen
 thyer vnd schedlich fuochs . Arrius . Appollina
 F206-043v,33 ris . Eutices . Nestorius . Sabellius . Pelagius vnnd vil ander ketzer so
 F206-043v,34 gar haben zerryssen . verwuostet vnd zerstoret . Aber das sunderlich boeß grymmig thyer vnd der
 schedlich Eber Machomet . wie gar verderbet er denselben wyngarten noch hutt vnd vß ruotet all fruchtbar stoeck vom
 grund . Wer mochte mit trucken augen sollichs bedencken oder lesen so er dieselben edeln land lyplichen oder seelichen
 syhet so gar vom waren glauben veruallen vnd gewychen . Als das groß wyt landt Asiam . das sanctus Johannes der
 euangelist mit so grosser müw vnd arbeyt mitt suoben bistumen hatt fundieret . gepflantzet vnd gezyeret vnd dem cristen
 F206-043v,35 lichen namen vnd glauben vnderworffen . Jten das gantz mechtig land Affricam . darzuo das rich
 land jndiam . das loblich land Grecian . welche all vorzyten so mit heiligen personen . so mit hochgelerten vettern vnd
 bischoffen erfullet syn gewesen . als Augustinus was . der ein besunder zung der gottlichen wyßheyte . eyn lüchtender
 gem oder karbunckel der lerer . eyn starcker hammer aller ketzer . vß sunderlicher fryheyte wurd ge
 F206-043v,36 nennet . Jtem johannes Crisostomus . der auch vmb wyrde wegen vnd schonheyt syner lere . eyn
 gulden munt wurdt geheyssen . Jtem der edel marter vnd zyrlcher vnd wyser reder Cyprianus . deßglichen Athana
 F206-043v,37 sius Allexandrinus . Johanes damascenus . Gregorius nyssenus . Gre
 F206-043v,38 gorius nazanzenus . Hilarius pictauensis . Basilius cesariensis vnnd vil ander vast gelerter menner
 vnd heilig vetter . welcher aller wan ich nit mee dan yr namen bestumen vnd erzelen solte . wurd mir zyt vnd pa
 F206-043v,39 pir gebrechen . ich geswyg solt ich yr lob vnd bryß vß trucken . Aber leyder wie gar haben syther
 die nesseln . dorn vnd disteln denselben schonen wyn
 F206-043v,40 garten oder acker vberzogen . wie gar syn alle ding verbrennet vnd vn
 F206-043v,41 dergraben . wie gar ist das golt tunckel worden . vnd die schon farwe ver
 F206-044r,01 enderet . vnd die steyn deß tempels yn all strassen zerstreuwet . Ach wo syn nun die heyligen vnd
 edelen kirchen do ettwan vnd vor kurtzen zyt
 F206-044r,02 ten die patriarchen yre stuoll haben gehebt . als do waren mit namen Al
 F206-044r,03 lexandria . Anthiochia . Constantinopol vnd Jherusalem . welcher kyr
 F206-044r,04 chen lob vnd wyrde nyman lichtlich mocht vß sprechen . O du heilige stat Roma . eyn frauw der
 welt . wo syn dise dyne swestern(das ist die ytz ge
 F206-044r,05 nanten kirchen . dir etwan gehorsam . andechtig . vnd nehest an hangende) hyn kommen . wiewol
 du den obersten stuoll hast . wan die fursten der kyrchen sant Peter vnd pauls mit yrem bluodt vnd glauben dich haben
 gewyhet vnd gewirdiget . noch dan der stuoll vnd kirch Allexandrina hette vorzyten die nehest statt nach dir . als von
 sant marx dem euangelisten vnd sant Peters junger besessen vnd gezyeret . Darnach die drytt statt hette der stuoll vnd
 kyrch Anthiocena do ettwan sant Peter suoben jar sel
 F206-044r,06 ber wonet vnd nach ym sanctus Jgnacius durch ynen dar vff gesetzet . an welchem end auch der
 cristenlich name erstlich ist etsprungen . Dar
 F206-044r,07 nach die vierde statt stull vnd kyrch Constantinopolitana von dem cri
 F206-044r,08 stenlichen grossen keyser Constantino erbuwen vnd neuw Rom genen
 F206-044r,09 net . Als dan derselb keyser mit vil mechtigen roemern da hyn komende syn keyserthum dar satzet
 . Zuoletzst der stuoll vnd kyrch Jerosolimitana den vnser herr mit sym eygen koserlichen bluodt hatt gewyhet . Dise

sprich ich kyrchen all O roma waren vorzytten die nechsten nach dir kusch jungfrauwen dem konig cristo zuo gefuoret . Aber leyder ytz syn sie vil zuo verr von dir . frembd von dir . beflecket vnd vnkusch worden . verual
F206-044r,10 len von der eynfeltikeyt deß waren glaubens . Doch(gott sy lob) yn oc
F206-044r,11 cident da die suonn lyplich vnder geet . vff geet vnd schynet die suon der ge
F206-044r,12 rechtekeyt gar klar . so leider yn orient . lucifer der geualler waz syn tron hatt gesetzet vber ander
sternen . Hye ist das liecht der welt . hye ist das saltz der erden . hie syn guldene vnnnd silbere geschyrr . Aber dorth ist
ein grusselich tunckelheyt vnd dicke vynsternüß vnd ein bild deß todts . Jtem eyn vnnutz saltz daz sust nit nutz ist dan
daz man eß vß schutte vnd wer
F206-044r,13 de vertretten von den menschen . Jtem kum yrdene oder holtzene geschyr syn da . die der yßen
ruothen vnd deß ewigen brandts warten . also ist ley
F206-044r,14 der verdorben vnd gantz vngheorsam worden das gantz orient . besun
F206-044r,15 der das kriechsch land . daz beuor nit verstan wil daz die heilig Romsch kyrch nit von den apostolen
. sunder von vnserm herrn vnd heylmacher cristo hatt die erste statt vnd wyrde erlanget . als er zuo sant Peter sprach Du
bist Petrus vnd vff denselben velsen wil ich buwen myn kyrch vnd die porten der helle vermuogen sie nit vberwynden .
vnd was du vff losest vff erden wurd auch vff geloset syn yn den hymelen . vnd was du byn
F206-044r,16 dest vff der erden wurd auch gebunden syn yn den hymelen . darvmb der hatt allein die romsch
kyrchen fundieret vnd geuestiget vff den velsen deß an vahendes glaubens der dem sluosseltreger sancto Petro deß yr
F206-044r,17 deschen vnd deß hymmelschen keyserthums gewalt vnd gerechtikeit hatt beuollen . demnach keyn
zwyfel ist daz wer derselben romschen kyrchen vngheorsam ist vallet yn ketzery . vnd thuot wyder n glauben . wer wyder
sie thuot . die ein meisteryn vnd muoter ist deß glaubens . vnd ist dem alleyn wyderspenig der sie vber all ander kirchen
hatt gesetzet . darvmb sancetera⁹ Ambrosius offt saget yn den heiligen concilien vnd sust . daz er yn allen din
F206-044r,18 gen wolt syn meisteryn die roemsch kirch eren vnd der nach uolgen . also auch sant jeronimus
vermeinet den stuol vnd glauben petri . durch den gotlichen mund cristi gelobet . yn allen sachen syn zuo forschen vnnnd
der nach zuo uolgen besunder wan ettwas ketzery oder yrtum sich erhebet . also auch all cristen
F206-044r,19 menschen thuon sollen . wan wo der lyp ist dahyn versammeln sich die adeler . Vnd die glyder
volgen billich nach den haubt . Aber die kriechesch kyrch verblendet durch eygen hoffart vnd vngheorsamkeyt . wil
leyder diß nit begriffen . vnd sittemal sie vßwenig der arch noe ist . ist nott daz sie verderbe . wan vßwendig derselben
nyeman behalten mag werden . wan als all lerer vnd geschriften sagen ist nit mee dan ein eynige heili
F206-044r,20 ge vnd vnbefleckte muoter die cristenlich kirch . die eyn haubt hatt . durch eynen geist wurd
lebendig gemacht . die auch vff eynen glauben ist ge
F206-044r,21 satzet . Vnd wer sich vß sunderet von eynikeyt deßselben glaubens oder von gemeynschafft sancti
Petri . derselb mag von synen sunden nit ent
F206-044r,22 bunden werden . auch die thuor deß hymelriches numer yn geen . welches alles(wolte gott) die
verstopfften kriechen vnd ander nacionen ynn orient wonende . wol zuo hertzen nemen . damit sie ettwan wydervmb ke
F206-044r,23 men vnder gehorsame der heiligen roemschen kirchen . vnd nit also yn yrer yrrung verdampt wurden
. // Eyn clag vber den ellenden statt der kyrchen yn occident mit eyner ernstlicher vermanung zum ersten yn eyner
gemeyn . darnach besunder zuo den fursten deß richs vff das sie mee gevlyssen syen zuo hilff vnd be
F206-044r,24 schyrmung der kyrchen . SO ich die alten vnd ytz vergessen auch wyt vnd verr von vns gelegen
vbeln(vermeyn ich der heiligen statt jherusalem vnd anderer lande yn orient wie ob genant syn) so vnnutzlichen beclag .
straff ich mich selber nitt vnbillich . derselben erbeyt vmb sust gethan . So(als aller cristenlicher mengklich wissen ist)
so vil nüwer . frischer . offt gegenwirtiger vnd vns allernehest vbel vnd scha
F206-044r,25 den vns vor augen lygen . vnd wir doch derren nit achten . besunder zuo dissen sweren zyten . yn
welchen all menschen geneyget syn zuo suochen ey
F206-044r,26 gennutz vnd die ding die yr syn . als der apostel spricht . nitt den gemey
F206-044r,27 nen nutz . nit die ding die cristun jhesum an treffen oder syne kyrch . Vß wel
F206-044r,28 cher vrsach diß volget von not . daz mit gemeynem schaden der gantzen kyrchen teglichen vil vbel
vns begegengen vnd wyderfaren vnd biß fur vnser thuor kommen ja treüwen eyn schnellen yngang biß yn vnser huß vnd
ynnerlichsten heymlikeyten . wan all die obern bede geistlich vnd welt
F206-044r,29 lich slaffen eyns sweren schedlichens slaffs vnd verachten solliche vbel diewile sie alleyn mogen
ettrynnen obwol yr vnderthan oder mitt
F206-044r,30 bruoder verderben . gefangen oder ertodt werden . Vnnnd syn leyder gar wenig die sich als eyn
muer setzen vnd stellen wyder die . die das volck gottes die arm cristenheyt betruoben . Demnach sytzet die muoter vnd
frauwer aller volcker(das ist die kyrch) yn grosser trurikeyt . vnd ist nyeman der sie troeste vß allen yren lieben kyndern .
Welcher cristenmensch vernunft gebruchende . mercket nit . ja weynet nit . vnd claget von hertzen . an gesehen daz eyn
gantzer gemeyner nutz der cristenheyt so swerlichen an gefochten geleydiget vnd betrubet wurd . ja also gemynderet daz
er sere an vahet zuo wackelen vnd zuo val
F206-044r,31 len . wan eß doch kundt ist vnd leyder vnserer bruoder vil das befunden haben mit eygem schaden .
wie die vynd deß cristenlichen namens vnd bluots ja gotteslesterer vnd deß crutz cristi veruolger vnd verhasser deß alleyn

waren glaubes(die turcken rede ich) yn kurtzer zyt vnd wenig oberen verschynen jaren . so starck vnd krefftig syn worden vnd zuo nemen von tag zuo tag . vnd wir dergegen so swach so nyder . ja so trege vnd hyn

F206-044r,32 lessig syn worden . daz wir sollich vor augen sehen vnnd biß an vnser syten lassen komen . vnd doch nichts dar zuo thuon . welchem menschen mag vnwissen syn wie dieselben vnser todtlich vynd . durch vnser versumli

F206-044r,33 keyt haben vnder yren gewalt bracht mechtige keyserthum vnd kongrich grosse vnd riche land . namhafftig vnd geweltig stett . werlich sloß vnd ynsel . Als(daz ich derren eyne kleyn teyl nenne) Constantinopel . Tra

F206-044r,34 pezuncium . keyserlich stett oder wonung . Traciam . Boecian . Atticam . Ma

F206-044r,35 cedonian . Thessaliam . Achaia . Etholiam . bede Mysiam . grosse konig

F206-044r,36 rich vnd land . darzuo Tribalos . Scordiscos . Tanricos . bastarnas mech

F206-044r,37 tig volcker . vnd vil ander stett die ich vmb kurtze wegen hye nit erzele . ertodt yre keyser . vertriben yre konig vnd herren . verbrennt vnd verwuostet die landtschafft . erstochen die ynnwoner oder ynn gefengnüß gefuoret . welche land all der Turck ytz bekummert ja fry besitzet . Vber das alles was er grossen schaden vnnd bludtvergyssung hatt zuo gefuget dissen nach uolgenden landen vnd luthen Peleponesicis . Dalmaris . Epirotis Yllirij . Noricis . Panonijs . vnd germanis . das ist vns teutschen . ha

F206-044r,38 ben wir dick vernomen vnd ettlich der vnsern offft erfahren . Vnd damit ich nit zuo wyt vß fließ yn diser rede . wil ich vbergan das groß meer . sust Euxinum oder mediterraneum genant . welches der Turck ytz vngheyn

F206-044r,39 dert vberfaret vnd yn haltet . besunder nachdem vnd er bestrytte vnd ge

F206-044r,40 wan die statt Capha die die janueser vorhyn besassen . Jch fur fare auch die edelen ynselen Mittelenem . vnd Cicladis insulas . vnd Nigropont die man sust nennet Calcidem Euboie . vnd Cozoram . die die walchen Scutarim heyssen . vnd vil ander cristenlich stett . welche all der turck vn

F206-044r,41 der sym sweren gebiet vnd gewaldt ytz regieret . Jch geswyg der bludt

F206-044v,01 sluossigen vnd grossen kriegten vnd stryten . so der turck wyder die vene

F206-044v,02 digsch herschafft vff land vnd wasser hatt gefuoret . Jch beruore auch nitt die scharffen kriegßhendel . plagen vnd todtlich geyselungen . so der turck dem cristenlichen konig von vngern vnd denselben landen auch zuo vn

F206-044v,03 sern zyten offft vnd dick hatt zuo gefuoret . Wer hatt die edel statt vnd jnsel Rodyß eyne veste port der cristenheyt yn kurtz vergangener zytt vnder

F206-044v,04 standen gar vnd gantz vom grund zerstoren . Der turck . Wer hatt ynn noch neherer zyt die statt vnd ertzibistum Ydruntum genant yn welschen landen ligende mit grosser schand aller andern cristen vnd bludtver

F206-044v,05 gyssung derren die darynne waren . mit gewaldt gewunnen vnd den ertz

F206-044v,06 bischoff derselben kirchen mit eyner holtzen seggen mitten entzwey gese

F206-044v,07 get . Der turck . Wer hatt das bistum Melfacense vnd vil edeler kirchen yn dem selben . darzuo stett vnd dorffer ynwendig vergangen jaren gantz verbrennt vnd der erden verglichen . Der turck . Wer hatt das schon land Apulian genant am meer gelegen so gar verwuostet vnd verderbet . besun

F206-044v,08 der gegen dem meer zuo . gantz zerstoret . Der turck . Welcher auch vber al

F206-044v,09 les dissen syn blutigen augen . durch sollich syg offft gehebt von vns ge

F206-044v,10 stercket . richtet vnd swyngt vngezwyffelt wyder das romsch rich vnd cristenlich keyserthum . mit synem wol schnydendem swert vns allen den todt treüwende . Noch dan yn allen sollichen verderblichen vellen vnd sweren leuffen . yn sollicher verwuostung der cristenlichen lande . zersoreun

F206-044v,11 gen der kyrchen vnd closter . hynfuorung der jungen . ertodtung der alten . ermordung der vnschuldigen kynderen . was darwyder geschehen sy . was darwyder gestirten oder gefochten worden sy von denen die die hochst oberkeyt halten yn der kyrchen . vermeyn ich nyeman von aller cristen

F206-044v,12 licher comun verborgen syn . Also leyder slaffen alle die . von denen wir armen cristen als die schefflyn von yren hyrten . wan sie wacheten vnd hyelten die wacht der vynstern nacht als sie schuldig syn zuo thuon . heyl vnd beschyrmung solten hoffen vnd warten . Aber waz gemuots mogen wir syn . so eß also lyederlichen zuo geet . oder waz guots vß sollichem verlessi

F206-044v,13 gem vnd versumlichem regiment mag vmmer mee komen . Vil baß be

F206-044v,14 fynden wir eß dan wir eß mogen vß sprechen . Sollich regierer syn glich eym schyffman der mitten vff dem meer vnder grossen starcken vnge

F206-044v,15 stumkeyten vnd gewytterem liget schlaffende yn synem schyff . Jtem ey

F206-044v,16 nem wechter vff eyner wardt der do slaffet vnd keyn zeychen gybt . Jtem eynem hunde der numer bildet . // Sollich wolles tu vnser aller heilig

F206-044v,17 ster vatter der babst zuo hertzen nemmen als du auch vngezwyffelt mee thust dan wir villicht bekennen . vnnd syhe an wie eyne getreüwer vnnd vlyssiger schyffman thut yn synem schyfflyn . so die starcken wyderwer

F206-044v,18 tigen wynde vffersteen . so sich das meer erhebet . vnd die fluß sich bewegen vnd die wellen das schyfflyn an stossen . ja vndersteen vmb stossen vnd vff die syten werffen . darzuo das schyfflyn an die velsen vnd yn die sorg

F206-044v,19 lichen slunden wurd getryben . dan ist der patron oder schyffman etwas lieb vnd trüw haben vnd vlyß zuo heyl deß schyfflyns vnd syn selbs . so ist er der erste an der erbeyt . er ruoffet vnd schryt vnd vermanet all die

andern zuo erbeyten oder zuo betten vnd gott an zuo ruoffen . vnd hatt keyn ruog oder rast . daz wetter werde dan
 gestillet vnd damit das schifflyn mitsampt allen denen die darynn weren yn mee sicherheyt vnnd besser zuoversicht durch
 syn trüwe gesetzt . Meynung hyr ynnbegriffen . verstest du o ober
 F206-044v,20 ster nach cristo . Patron deß schifflyns der kyrchen nach dyner hochsten vernunft vnd wyßheit aller
 bast . demnach ich nit mee rede . bruch diß mal . // Deßglichen du o aller gnedigster vnd cristenlichster roemscher
 konig . Maximiliane mit gemeyner freüd vnd frolockung eyner gemeynen cri
 F206-044v,21 stenheyt nüwlichen durch all kurfusten eynhelliglichen erwelet vnd froli
 F206-044v,22 chen gekronet . wollest nach dyner hohen vnd erluchten vernunft wyßheyt vnd mangfeltiger gnad(
 welche all yn besondere nyman joch wolspre
 F206-044v,23 chender kluoger reder mochte yn vil zyten . auch grossen vlyß darzuo ge
 F206-044v,24 bruchet erzelen nacheinander . aber noch mynner mitt billichem lob be
 F206-044v,25 schriben) so du von gott richlichen hast enpfangen . solliche ob beschrie
 F206-044v,26 ben sachen erkennen . wol wegen vnd bedencken . was darzuo gehore vnd was dyn konglich ampt
 darzuo notturfftikeit der gemeynen cristenheyt von dir begere vnd vordere . Doch ynsunderheyt dise glichnuß eben ver
 F206-044v,27 nemen die auch an dir oft ist erschnen . als vff sollich meynung . wie sich eyn fromer trüwer furst
 bewyset mitten yn eyner statt vnder synen vn
 F206-044v,28 derthanen vnd willigen gehorsamen sytzende so dieselb statt mit synen vynden vmbgelegt wurd .
 vnd die fackeln eyns strengen kriegß an va
 F206-044v,29 hen brennen . vnd all spyl Martis(deß abtgotts deß strits) sich erheben vnd zuo ryngvmb . al ecker
 . wyngarten . vnd baumgarten verwuostet wer
 F206-044v,30 den . darzuo vyhe vnd menschen vff dem velde gefangen . die weg verstellte . damit daz keyn gehilff
 den belegerten zuo kome . Zuoletzt ein werhafft
 F206-044v,31 ger sturm der voltrucken moge tag vnd nacht . an gerichtet vnd yn orde
 F206-044v,32 nung steet vor der statt . dem die erschrocklichen buochsen . vnd grüssenliche vaß nyder geworffen
 vorhyn die muren vnd zynen eyn weg haben ge
 F206-044v,33 machet . was dan derselb from furst . sollich alles vor augen sehende . thete . saget ytz dir O
 sysgsemester herr dyn eygen cristenliches vnd trewes hertz Er wurde nit lang byten . er beruoffet syn ritterschafft vnd
 heer zuosamen . er stercket sie mit wyser kluoger rede vnd vermanung . jn maß wie ettwann der truow vnd kuon furst
 vnd ritter judas machabeus thet . Er wurde lassen vff blasen vnd erklyngen syn heerhorn vnd slahen yn die busunen vnd
 truompten . vnnd nitt anders dan wie ein bewegetter lewe wurde er mitt
 F206-044v,34 sampt synem durch ynen gestercktem volck wyder die vynde durchtrin
 F206-044v,35 gen . vnd mit ordnung vnd vyßheit . thuorn vnd zynnen vorhyn versorget . vrblutlichen vber sie
 vallen . Vnd on zweyffel da ein sollicher furst ist ynmitten sollichem heer . da muß syg nach uolgen ja guot lob vnd eer
 7c // Was ich hiemit vermeyne ist diner hohen vernunft durchluchtigster herr gar wol durchsichtig . darvmb ich eß nit
 wyter wil vß strecken . hof
 F206-044v,36 fende dyn koniglich maiestat werd zuo bequemlicher zyt vil grossers yn wercken erzeugen dan ich
 vermag beworten // Nit myner O all yr hoch
 F206-044v,37 gebornen cristenlich fursten . der gemeynen cristenheit beschyrmer erkenen daz yr müssen rechnung
 geben vmbwegen der kyrchen die yr von cristo haben enpfangen zuo beschirmen . Wan darunb haben yr so hohen gewalt
 erlanget . daz yr durch denselben . cristenliche zucht bewaren . also das . daz die priester oder geystlich prelaten nitt
 vermogen durch mundtlich vermanung besseren dasselb straffe uwer gewalt durch erschreckung oder vßbung deß swerts
 . Vnd wiewol vch allwegen zuo gehort die kyrchen beschirmen . wyttwehen vnd weysen trosten . die bosen zemen . eym
 yeden syn recht thuon . retten die die gewalt lyden . den armen hilff thuon . straf
 F206-044v,38 fen dyebery . raubery . eebrechery . verrettery . mordery . vnd all sollich vbel
 F206-045r,01 theter nitt lassen leben . uwer vnderthan nitt lassen vbelthuon . als das uwer furstlichen
 großmechtikeyten wol kundt vnd wissen ist . vnd uwer ampt vnd stat by uwer selen heyl das vorderet . Noch dan zuo
 disen sorg
 F206-045r,02 lichen zyten . so das gantz meer wuotet . vnd das schifflyn Petri so swer
 F206-045r,03 lichen mit den flussen vnd wynden wurd an gefochten daz eß gar by an vahet zuo versyncken vnd
 zuo grund gan . Jr die do die ersten nach uwren grad vnd stat am spitzen sollen steen vnd manlich stryten . wolen
 gar eben zuo sehen vnd wol durchmessen was yr gott vnd syner sponen der cristenlichen kirchen schuldig syen . vnd
 sollichem nach notturfftikeit vnd moeglikeyt so verr an vch steet nach komen . Wollen auch wol erkennen vnd zuo
 hertzen vassen . was sollich versumlikeit vnd schedliche sleffrikeyt bißher mit grossem schad vnd schand der kirchen .
 gesehen vnd befunden entlich werde bringen . // Worvmb aber sollich vbel hievor erzelet vnd vil ander so ich hie ver
 F206-045r,04 swyge vns haben vberuallen . vnd besweren teglich so mangfeltiglichen ob yman deß ein wunder
 hette lyget die vrsach vor vnsern augen . Wan welcher mensch syn gesicht yn dise welt vß strecket . der syhet von stund
 an dieselb gantz erfullet mit sunden vnd lasteren . mit allem betrug . falscheit vnd vngerechtikeit . vnd als dauid spricht .
 all schalckhafftikeyt wonet mitten vnder den menschen . hoffart hatt sie vmbuangen . sie syn bedeckt mit boßheyt . yr

sund flußt vß yrer feyste . sie volbringen mit lust den boe

F206-045r,05 sen willen yrer hertzen . demnach ist vnfrid yn der statt . vngerechtikeyt vmbgybet sie tag vnd nacht . mitten daryn ist erbetselikeit . vnd vff yren gassen hort nit vff wucher vnd betruglikeit . welches dauid von gott er

F206-045r,06 luchtet von der statt diser welt hatt erkennenet vnd prophetiret yn eyner gemeyne vnd man syhet eß teglichen vor augen . also daz man mag cla

F206-045r,07 gen mit eym andern propheten der also spricht . Sun vnd mon syn vyn

F206-045r,08 ster worden vnd die sternern haben verloren yr liecht . yn welchen worten der gantz stat der cristenlichen kirchen . der obersten . mittelen vnd nyder

F206-045r,09 sten halb wurd beweynet . als guot zu mercken ist . by vnderscheyd vnd grad der sunnen . deß mones vnd der sternern . Darvff auch glich luthen die wort eyns andern propheten der eß mit andern worten also vß truc

F206-045r,10 ket sprechende . Alle haubt syn kranck . vnd alle hertzen trurig . vnd alle fuß vnreyn . vnd von der versen deß fuß biß zuo der scheytel deß haubts ist keyn gesundtheit an dem lyb . by welchem lyb als wolkundt ist die ver

F206-045r,11 samelung der cristen menschen bedutet wurd . was aber das haubt als das oberst . das hertz als das mittelst . die fuß als die vndersten an zeugen . mag ein yeder wol fur sich selbs mercken . Demnach nit wunder ist daz so die grossen liechter diser welt tunckel syn worden . die gantz welt vynster

F206-045r,12 nuß lydet(das ist) so die geistlichen prelaten vnd die gantz pfaffheyt so vbel leben als dan nit mag gelaugnet werden . doch nit guot ist gantz zuo entploessen . ist nit wunder daz die leyen auch darnach thuon . wan so der hyrth yrr geet . ist nit wunder daz die schefflyn abweg lauffen . vnd also ist leyder war daz Alanus vor lang hatt beclaget . begriffende die gemeyn yrthum der gantzen welt yn disen wenigen . aber swangeren worten . Glaub vnd trüw yn diser welt ist komen vff daz letzt . vnd geen slaffen . vnd die nacht der vntrüw hatt vberhandt genomen . der clar stern der gerechtikeit ist kranck geworden vnd gibet kum ein schatten . Vnd ist dar

F206-045r,13 zuo komen daz ettwan verdeckt vntuogend . yetz nit wollen bedeckt syn . vnd begeren keyns mantels . sunder all sund vnd laster werffen all bedec

F206-045r,14 kung hyn . vnd ferwen sich nit mee vnder gestalt der tugend . aber glosie

F206-045r,15 ren sich offenlichen . das recht wurd oft geurteylet vnrecht . die tuogend ist vberwunden durch die vntuogent . all toechter der tuogent müssen yn daz ellend . der vntugent werden die zuogel vnd zeym verhenget nach yrem willen . vnd so die selb vntuogent . als Bohecius beclaget . also herschet vnd regnirer . so wurd die tugent nit allein beraubt yres lonß . sunder auch mit den fussen der sunder vertreten . vnd muß straff lyden . die sach deß vnschuldigen wurd verwendet yn vnrecht . vnd der vbeltheter syeget vor dem angesicht deß richters . Welche vil anderen mochten nütz syn . werden verachtet vnd verworffen . als vßkerech oder vßfegung diser welt . Aber welche großmutig vnd starckwillig syn zuo anderer menschen verderbung . syn ytz allermechtichsten tyranen . der verkerth sytzet schynbarlich vff den richterlichem stuol . davor der gerecht kum thar erschynen . der rich wuoche

F206-045r,16 rer meret syn guot on ende . vnd der . der den armen wol geneiget wer hat selbs nit zuo leben . die frauen verlassen yr zucht vnd tapfferheit . vnd ha

F206-045r,17 ben all horesch wiß vnd geberde an sich genomen . vnd den heiligen kuschen joseph veruolget das boeß wyp . der reynikeit vyndin . Vnd waz soll ich vil vmbust erzielen . Der lerer Crisostomus hatt vor lang gesaget spre

F206-045r,18 chende also . Das gesatz oder geschrift ist geflogen von den pfaffen . ge

F206-045r,19 rechtikeit von den fursten . radt von den alten . glaub von dem volck . liebe von den eltern . reuerentz von den vnderthan . geistlikeit von den monchen ersamkeit von den jungen . zucht von den clericken . lere von den meistern . vlyß von den schülern . glicheyt von den richtern . beschyrmun von den rute

F206-045r,20 ren . eynikeit von den burgern . forcht von den dienern . gemeinschaft von den bueren . warheit von den kauffluthen . tugend von den edelen . kuscheit von den jungfrauen . demuotikeit von den wyttwehen . liebe von den eelu

F206-045r,21 then . geduldt von den armen . Also ist gemeynlichen zuo reden der stat di

F206-045r,22 ser welt . also leben wir deß meyerteyls all blyndt . vnd gan yrr also das ob die menschen die mit tuogent vnd guoten sytten . mitt glauben . mit wa

F206-045r,23 rer wyßheit . mit geistlikeyt . mit kuscheyt . mitt aller gerechtikeit gezyeret vnd schynbar(derren doch wenig zuo diser zyt gegen der zall der bosen ge

F206-045r,24 rechnet . syn) wurden von mitten diser welt hynweg genomen . was wurd da belyben dan ein grusenliche vynsternüß . // Welchem allem nach so diß gantz welt also gesetzet ist yn ein boß für oder yn boßheit darynn sie brynnnet . vnd gottes liebe mitsampt der bruderlichen also verloschen ist . vnd yn allen stetten die nuw welt sich so gar von yrem vrsprung oder erst

F206-045r,25 licher gerechtikeit verenderet hatt vnd verwyteret . ist licht zuo erkenen die vrsachen darvmb so vil plag . so vil straff . so vil vbels dem cristenlichen volck begegnet . Darvmb auch der guotig vnd barmhertzig gott gezwun

F206-045r,26 gen wurd durch vnser myßtat zuo uerhengen daz vber vns herschen vnd regniren die glyßner als job spricht . das ist . sollich regirer . die allein den namen vnd tyttel der vetter oder hyrten . vnd der beschyrmmer oder fursten haben . Aber yn warheit nit mee dan stoeck . sulen . oder zeychen syn der sel

F206-045r,27 ben . derren ampt sie fur tragen . Darvmb auch gott verhenget daz der lew von dem waldt . vnd

der wolff vß syner huolen vns oft vberuallen . vnd so die hyrten also schlaffen . zucken sie die schefflyn vnd todten vnd verderben wie sie wollen . wan ynen nyeman wydersteet vnd yederman durch die fynger syhet . Darvmb noch mee nach billichem vrteyl gottes vneyneikeit vnd gezencke ist vß gossen vber vnser fursten . also daz sie yr

F206-045r,28 ren yn eym vnweg . vnd nit vff dem weg . wan sie wydereynander gekeret . die scharpffen swerth die sie yn den helsen der vngleubigen gott solten wyhen . beflecken sie gar grymiglichen mit yrem eygem bluodt . als ob sie darvmb die swerth truogen daz sie das cristenlich bluodt allwegen solten vergyessen . vnd ewigen vnfyden vnder ynen selbs füren . vnd nitt vil mee zuo straff der vbeltheter . zuo vffenhaltung der guoten . zuo beschyrmung der kirchen dieselben swerth hetten empfangen . O yr edelen konig vnd fursten . mercken . mercken . wie vil mochte mit den bluodt das uwer hende on not vergossen haben yn kurtz vergangener zyt wyder bracht syn wor

F206-045r,29 den derren stetten vnd landen . die der turck yn kurtzer zyt ym hat vnder

F206-045r,30 worffen vff land vnd ym meer . Sunderlichen verstanden vnd an gesehen(daz ich mit laub rede) daz nichts anders krieg vnd vnfyd vnder vch gemeinlichen erquicket vnd erweget . dan eyntweder vnuernunftlicher zorn . oder hoffart . oder gytikeyt . vnd als yr wol wissen . vß sollichen vr

F206-045r,31 sachen . todten oder getodt werden . ist gar sorglich . Aber dargegen wie fry vnd sicher syn die ritter cristi . die wyder die vngleubigen stryten . vnd den krieg gottes vnd syner kirchen fuoren . welchen nit zuo forchten ist keynundes . so sie die vnglenbigen todten . auch keyn verderblichkeit oder sorg so sie von den selben ertodt werden . wan sie vmb gottes willen den todt eyntweder lyden oder den den andern zuo fuogen . Eyn sollicher sprich ich ritter . ertodet gar sicher vnd stirbet noch sicherer . wan er ym selber dienet vnd nutzt so er styrbet . vnd gott so er den vngleubigen ertodtet vnd wurt darvmb keyn todtsleger geheissen . sunder eyn beschyrmder der cristen . vnd eyn rachnemer gottes . darvmb derselb cristenlich ritter sich wol mag be

F206-045r,32 ruomen so er den vngleubigen ertodt . wan gott dadurch wurd geeret . // Dem allem nach O yr beschyrmder der cristenlichen geistlikeit . O yr huother der herdt gotes . furer deß cristenlichen volcks . Erwachen etwan vnd nemen zuo hertzen joch sollich vbel vnd schaden so noch oft vnd dick der armen cristenheit von den vngleubigen werden zuo gewendet . vnd ob yr(da got vor sy) villicht verzwyfelet alte vbel hievor erzelet nit mochten wyder wenden oder wyder keren vß vrsachen vch baß bekandt . so verlas

F206-045v,01 sen doch nit das vberig teyl gottes vnd der kirchen durch uwer hynlessi

F206-045v,02 keyt also ellendlichen verderben . jr sehen doch wol . worzuo eß komen ist Jn welches ortlyn die kyrch vor lang getrucket ist . Vß wie groß vnd wytt . wie eng vnd cleyn yn kurtzer zyt sie geworden ist . vnd waz ist mir nott vil wort vnnutzlich vergyssen . O all yr cristenlichen konig vnd fur

F206-045v,03 sten . diß ist allein myn begird vnd demuotig bitt an vch . daz yr die lobli

F206-045v,04 chen historien die grossen vnd tuogendsame werck vnd thatt . vnd die alten kroniken vnd geschrifften uwer eltern wyder wollen lesen oder horen vnd an sehen . die zuo yren zyten sollich haben gethan daz yr gedechtnuß noch billich yn lob ist ewiglichen . Doch ynsunderheyt wollen nitt vergessen deß schymbarlichens exempell deß aller cristenlichsten keyser ettwan karoli deß grossen grossen an lyb vnd an tuogenden . welcher vmb die zyt als man zalt von crist geburt achthundert vnd zwey jar . beruffet von eym patriarchen zuo jherusalem vnd eym keyser zuo Constantinopel . zoge vß mit grossen heer vber meer . vnd gewan jherusalem wyder vmb . vnd errettet das gantz heilig land von den henden der vngleubigen . darzuo das gantz konigrich hispanian . Vnd hett vnder andern konigen hertzogen grauen vnd rittern ynsunderheit eynen strengsten vnd fromesten ritter deß nam Rolandus was eyn erborner graff cenamonensis . eyn man ewiger ge

F206-045v,05 dechtnuß wirdig . der nach wunderbarlichen grossen thaten durch yn ge

F206-045v,06 schehen sygsamglichen sterbende . das ewig leben vngezwyfelt besytzet . // Jtem die thatten deß cristenlichen fursten Gotfridi von bulion eyns erbornen hertzogen von lotrnygen halten fur augen . vnder welchem vmb die zyt als man zalt von crist geburt . M . vnd hundert myner ein jar . Jherusalem vnd das heilig land aber eyns ward erloeset von den henden der sarracenen die sie by hundert jaren hetten vnder yrem gewalt yn ge

F206-045v,07 halten . Derselb hertzog vmbwegen syner tuogent vnd fronkeyt ward von aller ritterschafft der erste konig zuo Jherusalem erwelet . Jm welchem rich suoben cristenlicher konig nacheynander acht vnd achtzig jar regniet ten . Aber als dieselben zuolettst nit mee hilff hetten von dissan landen . nach vil müw vnd erbeyt . swer krieg vnd stritt vnd groß armuot so sye erlydten . ward Jherusalem wyder vmb von eynem Soldan yn genon

F206-045v,08 men vff die zytt als man zalt von crist geburt . M . c . lxxxvij . jar am andern tag deß monedts octobris vnder dem achsten cristenlichem ko

F206-045v,09 nig zuo Jherusalem Gwido genant . vnd ist von den sarracenen von der

F206-045v,10 selben zyt biß vff disen hutigen tag besessen . Mit demselben ob genan

F206-045v,11 ten hertzog Gotfrido zoge eyn grosse ritterschafft vber meer vnd eyn sol

F206-045v,12 liche menge anderer menschen die man kum mocht zelen . doch ward yr zal an geschlagen fur sechzghundert mal tusent menschen . Aber ym jar darnach als Jherusalem wyder von den vngleubigen ward gewon

F206-045v,13 nen als da man zalt tusent . hundert acht vnd achzgh jar von crist ge

F206-045v,14 burt . vnd nach dem general concilio das dazumall zuo Paryß gehalten ward . zoge der cristenlich konig von franckrich Philippus mitsampt dem konig von engelland Richardo . mit grosser macht vnd onzall vil edellen

vnd vnedellen vber meer . die all das crutz an sich namen . // Jtem yn nach genden jaren vil grosser thatten durch ettlich konig vnd fursten . besunder auch hertzogen von osterich vnd beyern . mitsampt der edelen ritterschafft teutscher nacion geschahen yn den landen . von wel

F206-045v,15 chen sachen allen gar vil vnd lang were zuo sagen . daz ich vmb kurtze we

F206-045v,16 gen vermyde . Diß doch hyn zuo gesetzt daz aller derselben andacht vnd liebe zuo gott vnd den heiligen stetten ewiglich ist zuo loben vnd zuo bry

F206-045v,17 sen . vß welcher sie nit mochten lyden gottes vnd der cristenheyt smach vnd schand . vnd haben yre cristenliche ritterschafft . ja yren starcken glau

F206-045v,18 ben wyder die vynd deß crutz cristi loblichen erzeugt . vnd darvmb groß gethan vnd erlydten . damit sie auch on zweyffel eruolget haben eyne ewi

F206-045v,19 gen kron der glorie . vnd syn noch vns vnnd vnsern nachkommen billich yn gedechtnuß zuo haben . Aber yr O konig vnd fursten erben derselben yn guottern vnd yn wyrden . sollen ynen billichen auch yn yren tuogen

F206-045v,20 den nach uolgen . vnd so yr yren ynnbrunstigen glauben . starcke hertzen groß andacht zuo gott vnnd syner kyrchen lesen yn geschrift oder horeen sagen . sollen yr mit wercken vnd thaten bewysen daz yr nit vß yrer ede

F206-045v,21 ler art koppen . oder entwachsen . von derer bluodt vnd stam yr vch beruo

F206-045v,22 men erboren . Eß ist die handt gottes als der prophet saget ytz zuomall nitt kurtzer oder swecher worden . dan sie dazuomall was da dieselben lebten . das er nit moge vch vnd vns als wol helffen als ynen . Auch ist der glaub yn dem cristenlichen volck noch nitt gantz(das gott woll nymmer verhengem) verloschen . darzuo radt vnd wyßheyt gebricht vch nitt keyn mangel ist an ritterschafft . oder gewerr oder kosten . Wan welcher cristen mensch wolt nitt darzuo helffenn mitt lyp oder oder guot . daz sollich vnser schedlich vnd todtlich vynd(die nit anders begeren dan vnser bluodt vergysen vnd deß numer ersettiget werden . die auch gott vnd die heiligen stett do vnser erloesung ist gescheen also leste

F206-045v,23 ren vnd geschenden) mochten vertrieben . ertodt . oder verdilcket werden . besunder so ein gemeyne nottdurfft sollichs vorderet . vnd groß elend vnd clag vnserer mitbruder an vil enden vns darzuo vermanet . vnd sollichs vbel noch verhanden syn . welche ist eß sach man nit fur komet . wir auch nit sicher leben mogen ym letzten vnnd am vssersten ort deß occidents . Hetten yr ein starcken glauben vnd eyne ynnbrunstige liebe zuo got vnd der armen cristenheit . eß wer noch vil guots vnd groß richtum . vil zyt biß

F206-045v,24 her von vilen versammelet yn der kirchen . welches zuo sollicher heiliger reyß(wan die durch die obersten haubt geordnet wurde) vngezweyfelt dar gereychet vnd erbotten wurden mit guotem willen . gott die hertzen der synen beruorende . Darzuo ritterliche rustung . geschick . kunst vnd vbung bluwet zuo diser zyt vnd ist so schynbar als ye . wan sich die ritterschafft . wiewol ytellichen . yedoch vlyssiglichen vbet yn ritterspielen offt vnd dick . so syn so mancherley nuw vnd erschrocklich weer nach allem fortel glitzende yn der cristenheyt als ye . Jtem so starck vnnd wolgeschicket helffer yn cristenlichem volck all willig vngezweyfelt zuo sollicher sachen Wan allem yr O aller cristenlichen menschen fuorer vnd beschirmer konig vnd fursten(fryd vnder vch gemacht vnd all sorglich krieg vor hyman gestellet) mit glichem gemuot . eynhelligen willen vnd wol versuontten hertzen . geneyget weren vnd guotwillig vch bewysen . so die obersten haubt sollichs begeretten oder hiessen . wie mochten yr sust uwer gehorsame vnd glauben . heiliglicher . loblicher . vnd verdynlicher . vmmee gott vnd der kirchen erzeugen . Jch wil nit darfur haben o yr cristenlichen ritter daz yr wolten vermeynen uwrem statt damit gnong geschehen . so yr die verbotten thorney vnd verwegen . auch zuozyt blutendig spyl . vnd offt lyben vnd selen schedlich . on not . mit sollichem grossem kosten vnd vlyß vß luter ytelheyt so offt vben vnd liebn . Was komet(bytt ich uch) vch ere oder nutz dar vß . so yr so vil erbeyt vnd kosten daran legen . vun dar zuo wenden . vnd doch keyn soldt enpfahen . dan sund schand oder den todt yr bedecken uwere roß mit sydentuochern . vnd malen schildt vnd helm . sattel zeum vnd sporen . mitsampt deß gantzen lybs weer . eß muß alles mit goldt vnd silber erglasten . vnd mit sollichem kasperlichem gezyrde vnd vnnutzer hoffart ylen yr offt zuo dem tod . O was grosser hilff vnd stuer mochte vß sollichem vberflussigem ytelen kosten . den yr yn solli

F206-045v,25 chen thorheyten vergiessen . der gemeynen cristenheyt wyder die vngleu

F206-045v,26 bigen erschiessen . wan derselb kost zuo sollichem heiligem gebruch wurde von uch gekeret . // Welche alle vnd derglichen ding . wollen yr nach uwer vernunft vnd wyßheyt . vmb gottes vnd uwrer selen heyle willen baß wegen vnd erkennen . vnd wollen uwer ritterschafft . ritterlich ere . vnd furstliche großmechtikeyt . ee vß uben zuo gottes lob . uwer selikeyt . der kyrchen beschirmung vnd rach der vngleubigen dan zuo sollicher ytelheyt . Das wurde vch vnd den uwren vil eerlicher ja eyne ewige gedechtnuß . vnd wurde uwer namen lobsam machen yn all nachkunfftig geslecht . vnd wurde vch darzuo schaffen eyne ewigen kron yn hymelen . den vch der gerecht richter cristus an den letzten tag wurde vff setzen vnd geben . vmb

F206-045v,27 wegen daz yr syn smach also haben gerochen an synen lesteren den vn

F206-045v,28 glaubigen hunden // Eß ist wol war das auch dieselben heyden nit we

F206-045v,29 ren zu toedten . wan sie sust ab stunden von sollichem vbel . vnd so sie vns scha

F206-045v,30 den zuo fugen . ja cristo an den synen vnd an syner kirchen die er mit synen bluodt ym selber zuo eyner sponsen hat erwelet vnd erloeset . Aber so sie on vnderlaß vns suchen zuo verderben . zuo erwurgen . vnd zuo

ertodten . ist eß vil besser daz sie auch ertodt werden von vns . dan das die ruth derselben als dauid spricht werd verlassen vber das teyl vnd erb der gerechten da

F206-045v,31 mit die gerechten yr hende villicht auch vß strecken zuo sund vnd boßheyt . vnd als noch mer dauid spricht . die geslechten sollen billich verdilcket werden die allwegen krieg vnd bluodtuergysung lieben vnd begeren . billichen sollen ab gesnytten werden von der erden vnd vß geruotet die . die vns stets betruben vnd leydigen . die vnsere land bekumern . die vnser bru

F206-045v,32 der yn hartem dienst halten vnd swerlichen vndertrucken oder vnbarm

F206-045v,33 hertzighen todten . ja vns all von vnder dem hymel verdilcken . moch

F206-045v,34 ten sie . hetten sie daz angemest vber alles das sie begeren . Demnach bede swert der cristenheyt billichen sollen vß gezogen vnd auch gebruchet werden an denen helsen sollicher swerer vnserer vynde zuo demutigen vnd nyderen alle hohe . die sich erhebet wyder vnsern gott vnd syne sponen vn

F206-045v,35 ser muoter die heilig kirch . damit eß nit darzuo kome daz sie vnser spotten werden sprechenden . Wo ist yr gott . Er helffe ynen ob er moge 7c . Dar vmb O all yr getruwen beschyrmer vnd kynder der kyrchen . ylen wyder die vynd cristi vnd deß cristenlichen bluodts . vallen yn sie wie erzurnet lewen . geben ynen wydervmb yn yre haubt als sie offt vnns haben ge

F206-045v,36 than . Syn eyns grossen vnd starcken gemuots . bewysen vch manlichen vnd gestercket werden uwer hertzen yn gott yn den yr hoffen . wan er wurt by uch syn als ein starcker stryter . vnd wurd syn vnd uwer vynd gantz zerknyschen vor uwer angesicht . Gedencken an die wunderlichen werck die er hatt gethan pharaoni vnd synem heer yn dem rotten meer . vnd al

F206-045v,37 ler syner erschrockenlichen vrteyl die er von welt zuo welt yn die verker

F206-045v,38 then nacionen hatt erzeuget . vnd sich yn ynen gerochen . aber die synen allzyt vß engsten erloeset . vnd behalten . er vnd unser aller behalten got der yn ewikeyt sy gelobet Amen . // Hye volget nach eyn grüssenlich gesicht ettwan dem keyser karolo bewiesen durch eyn engel gottes . welcher keyser der vierd nach den gros

F206-045v,39 sen karolo das keyserthum regiret mit synem zuonamen Caluus das ist gletzet genant . vnd ist dasselb gesicht nit on redlich vrsach hyr yn ge

F206-045v,40 setzet . // Von der statt Rodiße wie sie von den Turcken ward belegert vnd vnderstanden zuo gewynnen . SO ich hab willen zuo schriben wie die statt Rodiße von den Turcken belegert vnd vnderstanden ward zuo gewynen yn dem jar als man zalt von crist geburt . M . cccc . vnd . lxxx wil ich erstlich vrsachen erzelen . welche den turckeschen ty

F206-045v,41 rann machometun allermeyst haben beweget . die Rodiße herren also ernstlichen zuo leydigen . wiewol die rodiße herren von alter her mit den turcken nit kleyn krieg haben gehebt . yedoch mit dem der zuo der zyt herschet nach gewyn der statt Constantinopol ob beschrieben . ha

F206-046r,01 ben sie gar swer krieg gefuoret . wan derselb Tyrann von tag zuo tag syn macht vnd stercke meret vnd ynnwendig . xxiiij . jar vil lande vnd her

F206-046r,02 schafften ym nahe gelegen hatt ym vnderworffen deßhalb er yn hoch

F206-046r,03 muot vbertragen gar vbel mocht lyden die statt Rodiße vnd herschafft der cristenlichen ritterschafft der johanniten von synem gebieth fry wesen . Demnach er zuo viermalen mitt grosser macht die castel vnd jnsel der Rodisser hatt vberuallen . belegert vnd an geuochten vnd doch anders nit dan schand vnd schaden davon gebracht . wan der turcken vil wurden mit pffelen durch spysset . erhencket . erschossen . ertrencket . erstochen 7c . darvmb der ob genant tyrann erfahren vnd gemercket sollich adel vnd strengikeyt der Rodissen ritterschafft . deß er mit gewaldt nit vermocht vnderstunde er mit betruoglikeyt zuo uolbringen . vnd sendet ettlich krieg

F206-046r,04 esch botten gen Rodiße eyn versun vertrag oder fryd mit ynen zuo machen doch mitt dem geding . daz sie ym trybut solten geben oder ioch ettwas yn schenck wyß . daz aber die Rodiße herrn nit wolten vff nenmen . auch keyn gemeyn mit dem haben . der cristenlichen glauben veruolget . wel

F206-046r,05 chen sie vß yrer profession vnd gelobde schuldig syn zuo beschyrmern . Vß sollicher vrsach ward der turck mit mee haß vnd zorn beweget . vnd vas

F206-046r,06 set ym fur vberyn die statt Rodiße vnd den rodisser namen gantz zuo

F206-046r,07 uerdilcken . darzuo ward er auch geneyget durch ettlich die von den Ro

F206-046r,08 dissern zuo ym vielen vnd heymlich gelegenheyt der statt wusten . vnder welchen eyner was besunder Anthonius meligabo genant . zuo Rodiße er

F206-046r,09 boren . nit von dem mynsten geslecht . der all syn guot vnd habe hette ver

F206-046r,10 than zuo Rodiße . vnd vß vnmuot gedacht die statt dem turcken verrathen . vnd reytzet auch darzuo eyn fursten deß turcken . zuo Constantinopol wo

F206-046r,11 nende . Disem nach uolget eyn ander Demetrius zophonia geheysen . von nigropont geborn . welcher nach gewyn derselben statt nigropont . dem turcken dienet vnd ettwan zuo Rodiße hett gewonet . auch darnach vom turcken da hyn gesendet ward vmb fryden zuo tractieren . Als wol dry jar verschynen ynn sollichen anschlegen . ward der furst zuo Constantino

F206-046r,12 pol gantz darzuo geneyget . Auch vil verleugnet cristen die zum turcken waren geuallen . vermeynten

moeglich syn die statt Rodiß zuo gewyn

F206-046r,13 nen . Darzuo saget der verrether Anthonius hievor gemeldet wie die mu

F206-046r,14 ren zuo Rodiß an ettlichen enden swach vnd bruchig weren . vnd zuo disen zyten wennig burger
ynn der statt vnd groß mangel an fruchten oder korn . vnd wie die Rodißer keyn gehilff anders dan von verrethen landen
muosten warten von den cristen . Deßglichen saget auch Demetrius vnd all ander vynd der cristen waren mithellig . Also
daz diß zuo Constanti

F206-046r,15 nopol ward tractieret . rustet sich der furst vnnd oberst meister der Ro

F206-046r,16 dißer herren Petrus danbusson genant . eyner hohen vernunft vnd gros

F206-046r,17 ser wyßheytt mann . vß franckrich . seer edel erboren . der disen anslag woll mercket . vnd schuff
mit ylen die muren zuo ryngymb gebessert werden . Auch ettlich bollwerck von nuwem an erbuwet ynwendig den selben
jaren . vnd versahe auch die statt mit wyn vnd korn . vnd bestellet erber ritterschafft vß synem orden da hyn geschicket
werden . vnd dinget auch ander cristenlich soldner daz doch alles verborgen was dem verrether Anthonio . welcher on
vnderlaß den turcken reyztet Rodiß zuo belegen . darvber der turck vil rath hylte mit den synen . derren ettlich diß wy
F206-046r,18 derriethen vnd vnuoglich vermeynten . ettlich gantz anders redten . Ye zuo jungst fur sluog der
radt vnd sententz derren die eß meynten gar muog

F206-046r,19 lich syn . vnd wurden beschicket all buochenmeister deß turcken vnd be

F206-046r,20 sunder eyner georgius genant . welcher auch von cristen zum turcken was geuallen . vnd vor
ettlichen zyten die statt Rodiß vnnd die muren wol hett besehen vnd vff eyn tafel ettworffen . daz er dazuomal dem
turcken vberantwort vnd meynet daz so dick vnd starck muren nit mochten syn die er mit buchen geschutz nit wolte
ab schyessen . Zuo allem disem ward auch dem turcken syn grosse macht fur gehalten als der vorhyn zwey keyserthum .
zwolff konigrich vnd so vil land vnd stett ym hette vnder

F206-046r,21 worffen . darzuo were ym die statt vnd insel Rodiß wol gelegen . besun

F206-046r,22 der die cristenlande yn occident darvß zuo bekriegen 7c . Welchem allem nach ward vß geheyl deß
turcken eyn groß mechtig heer vff wasser vnd land bestellet vnd versamelet . vnd eyn teyl vber land geheysen zyezen
durch Asiam ynn Liciam das an Rodißer insel an stosset . von wanen sie zuo schiff fur Rodiß solten faren . Ettlich ander
fuoren yn schiffen mit

F206-046r,23 sampt allem kriegschem gezug von buchen vnd sollichem daz dar zuo gehoreet . Damit fur auch der
oberst haubtman disser reyß mitsampt de

F206-046r,24 metrio dem verrether . wan Anthonius der ander verrether dazuomal nit mee yn leben was . sunder
vnlang darvor schendtlich gestorben . Eß ward auch gebotten daz disse reyß den Rodißern nitt wuorde verkundet vorhyn .
aber eß ward doch offenbar . demnach der Rodißer meister alle syne castell mit soldnern vnd provand vnd gewere versahe
vnnd alles volck syner herschafft vnderworffen zog vß den dorffen yn die statt . wyn vnd korn mit ynen bringende vnd
die frucht vff dem veld wiewol noch vnzytig . wan noch nit gantz ern was . ab schnydende vnd yn fuorende 7c Als disses
mitt ylen geschahe . sahe der wechter vff der warth zuo Rodiß eyn groß schar vnd zall von schyffen mit vollen segeln her
faren vnnd verkundet eß bald dem meister vnd der statt . welches zuo schawwen groß welt zuo lieff auch groß forcht vnd
erschrecken ward davon empfangen . Also zuolendet dasselb schyffhere mitt hundert segeln am . xxij . tag deß monedts
Junij ym jar von der geburt cristi tusent vierhundert vnnd achzyg . ynn welcher zuokunfft ettlich turcken zuo roß vnd zuo
fuof fur die statt randten . aber die Rodißer nit vnbehend ruockten hyn vß vnd ver

F206-046r,25 iagten sie vnd ersluogen yr eyn teyl . welches auch zum andern mal ge

F206-046r,26 schahe . da doch eyn rodisser ritter vmb kam . deß haubt die turcken ab ge

F206-046r,27 schnyttten vom lybe an eyn glen hengten vnd mit schall davon rand

F206-046r,28 ten . Am andern tag nach zuokunfft der turcken legetten sie dry grosser buchen yn die gerthen sant
Anthonij kirchen an stossen . vnd viengen an den turn sancti Nicolai vff eym berg ym meer gelegen zuo beschyessen .
Am selben morgen fruw der turckesch buchenmeister Georgius genant hye ob bestymet . ward gesehen by dem graben
gende der deß meisters sal vmbgybet . vnd derselb gruosset die wechter fruntlichen vnd begeret yn

F206-046r,29 gelassen werden . vnd mocht gar licht syn gewesen er were von den an

F206-046r,30 dern die ynen nit mochten horen erschossen worden . Yedoch ward er den meister fur gebracht eyn
gerader man von lyb vnd kluog von synnen . von teutschem land erboren . So bald ward er gefraget der vrsach halb
warvmb er zuo ynen keme . Antworte er . er were zuo ynen . geflogen vmb

F206-046r,31 wegen den cristen bystande zuo thuon wyder die turcken . deßhalb er frunt

F206-046r,32 lich ward empfangen vnd gelobet syn furnemen so verr er daryn behar

F206-046r,33 ret . Gefraget furhyn der vynde halb vnd aller gelegenheytt der turcken saget er wie by hundert tusent
turcken da hyn weren komen vnd hetten mit ynen bracht . xj . grosser buchen . welche . xxij . spannen lang weren vnd
trieben steyn ettlich . ix . spannen ettlich . xj . wyt an der ruonde . Deß selben buchenmeisters halb was mancherley
sententz vnd argwon vn

F206-046r,34 der den rodissern . wan ettlich yn vermeynten eyn verrether darvmb kon

F206-046r,35 men syn daz er die rodisser betruoge . wan er eyn geschyder vnd boßhafft

F206-046r,36 ger man were . der vormals vil vbels hett gestyfftet . Ettlich ander leg

- F206-046r,37 ten eß vß yn eyn besserteyl . wan er eyn wyser man wer vnd ynen villicht ruwet syner vergangener yrthum . Als die turcken vernamen daz der
- F206-046r,38 selb Georgius von ynen was gewychen . schossen sie ettlich brieff yn daz schloß . welche yn hyelten man solt sich vor Georgio huoten vnd wol fur sehen als vor eym verrether . demnach der rodisser meister ließ ynen wol verhuoten vnd versichern vnd nit dester mynder bruchet er syn radt yn sachen buchsengeschutz an treffende . // Vor allen dingen vnderstanden die turcken den turn vnnd buohel sancti Nicolai zuo gewynnen . vermeynende wo sie denselben vnder yr gewaldt brechten . mochten sie die statt auch lichtlicher gewynnen als auch war was . Derselb buohel ist von den alten vorzyten wunderbar
- F206-046r,39 lichen mit henden gemachet worden vnd strecket sich dryhundert schrydt wytt yn das meer . darzuo all schiff muosen lenden . vnd ist doch syn ynn
- F206-046r,40 gang vff beden syten mitt velsen also beschlossen daz nitt mee dan eyn schyff zuomal mag dar yn faren . Vff demselben buohel ist yn kurtzer zyt eyn burg gebuwen worden da vorzyten ein groß eryn bild collosus yn latynn geheysen stunde . eyns von den suoben wundern der welt . welches nach dry vnd funffzyg jaren als eß gossen ward . durch eyn erdbydem vmb viele . von deß grosse ich auch vor oben hab geschrieben . Dry hundert grosser buchsensteyn schossen die turcken ynn dieselb burg . vnd wurffen damit das teyl vmb . daz gegen occident syhet . doch derselb vall beschir
- F206-046r,41 met den turn . wan die matery vom kalck . sande vnd kleynen steynen zuo
- F206-046r,42 samen vermischet . anhenglich gemachet . mocht nit also zerschossen wer
- F206-046v,01 den . das grosser teyl deß turns verlybe danoch stende . darvmb die vynd nit als licht dar vff mochten stygen vnd kommen . Als diser turn also ward gewuostet schuff der meister die burg durch mee soldner beschirmit werden . wann vß aller ritterschafft die strengsten waren darzuo erwelet die ynen solten bewaren . Eß ward auch von holtz ein bollwerck gemachet den turn besliessende vnd eyn grab dar vmb gefuoret vnd starck gewer vff den turn geordnet . deßglichen eyn ander gehilff yn zwyuolff geleet ettlicher ritter zuo roß vnd zuo fuß . welche hynderen solten daz die turcken nit mochten vff den buohel komen . wan das meer darvmb nitt tyeff ist . deßhalb daryn wurden bredter vnd borten geleet voll scharpffer negel damit daz nyeman da mochte rythen oder geen . vnd vnden an dem buo
- F206-046v,02 hel was auch eyn bollwerck gemachet vnd daryn aller vßerweltest rit
- F206-046v,03 ter bescheyden . denen oben yn turnen zuo hilff zuo kommen do der oberst meister yn synem harnesch mit zyrlichen wappen wol an gethan selber was . Vil buochsen wurden vff der muren besunder an den end geordnet da die turcken yre schyff ym meer hetten steenn . welchen grosser schaden zuo gefuoret warde durch dasselb geschutz . Eß waren auch vil kleynere schyfflynn mit durrem brennholtz voll vmb den buohel gestellet . welches an gezundt solt werden damit die turckeschen schiff zuo uerbrennen . wan sie ye wolten den buohel vnd turn besturmen . Als alle solliche ding wa
- F206-046v,04 ren geordent . geschahe groß wacht vnd ward all stund gewartet ynuol der vynde . Am andern tag darnach do sich eyn guoter wynd erhuobe vff
- F206-046v,05 loßten die turcken alle schyff vom land by sant Stephans berg . vnd fuo
- F206-046v,06 ren fur eyn berg Saburre genant vnd sturmten da den turn . doch ee dan sie vff das land traten . machten sie eyn groß geschrey vnd geruoff vnnd slugen vff all bucken damit die Rodißer zuo erschrecken . welche doch yn yren geweren yn ordenung bereyht stunden vnd mit macht mit armbrost vnd buchsengeschutz . trieben sie die turcken wyder hynder sich . vnd wur
- F206-046v,07 den yr gar vil erschlagen vnd erschossen yn disem ersten sturm . besun
- F206-046v,08 der suobenhundert on die die verwundet wurden . derren gar vil mee wa
- F206-046v,09 ren . Als die rodisser dissen ersten sturm vnd sieg behielten . ritte der oberst meister wolgezyeret mitsampt syner edelln ritterschafft yn maß eyns triumphs ynn die statt yn vnser lieben frauwen kyrch da sie gnedig ist vnd vil zeichen thuot allzuomall lob vnd danck gott vnd yr der jung
- F206-046v,10 frauwen maria sagende . vnd darnach yn das schloß mit essen vnd trin
- F206-046v,11 cken sich ergetzende . Die turcken aber gemercket sollich kunheyt der Ro
- F206-046v,12 disser . vnderstanden mit grosser macht den turn sancti Nicolai vnnd ander ort darzuo die muren all zuo eyrmall zuo beschyssen vnd zuo bestur
- F206-046v,13 men . damit daz die rodißer an vil enden zersteuwet . sich musten weren vnd deßhalb dester mynder starck weren . Demnach in der nacht her nach folgende . schuffen die turcken acht grosser buchsen fur der juodenmuer geleet werden . vnd ein ander buchß vnden an ein berg der gegen mitter
- F206-046v,14 nacht syhet . vff welchem die vbeltheter ab gethon werden . vß derselben buchsen den buohel darvff die wyndtmuolen syn gebuwet zuo beschyssen . Da der oberst meister sollichs mercket . bald er mitsampt allem volck gott vnd die jungfrau maria an ruoffet . vnd bestellet guote bewarung yn der statt vnd ließ der juoden huser die ym garten stunden ab werffen . vnd eyn bollwerck machen vnd ein nuwen graben vnd dafur eyn muer . wel
- F206-046v,15 ches mit grossem vliß by tag vnd nacht ward gemachet . daran der mei
- F206-046v,16 ster selber vnd all landvogt der rodisser herrn all priores . all ritter . all burger . all kauffluth . all frauwen vnd megde muosten erbeyten . steyn er

- F206-046v,17 den vnd kalck zuo tragen . vnnd ward nyemants geschonet . Die turcken fyerten auch nit . vnd mit grusenlichem geschutz swechten sie die muren also daz eß erschrocklichen was zuo sehen vnd zuo horen . wann alle die zuo Rodiß waren sagten daz sie nye grosser buchszen hetten gesehen oder ge
- F206-046v,18 hort die man wol hundert tusent schridt wyt mocht horen . vnd wan die buchszen vß giengen erbydemet die gantz statt vnd all gebuw wegen sich Deßhalb die rodisser all hoffnung hetten verloren die vssern muern zuo be
- F206-046v,19 halten . vnd gaben all synne vnd krafft darvff ynwendig yn der statt boll
- F206-046v,20 wercken vnd graben mit nuwen muren zuo machen . Vber das alles leg
- F206-046v,21 ten die Turcken ettlich groß morder syn auch buchszen glich den morder
- F206-046v,22 steynen vmb die statt . damit tag vnd nacht groß steyn yn die hohe schys
- F206-046v,23 sende . welche steyn yn die huser vallen vnd was sie treffen durchdringen Dasselb geschutz die turcken allermeist by nacht bruchten dadurch sie die burger seer erschreckten . wan nyeman yn den husern sycher was sun
- F206-046v,24 der yn die keller must man flyehen . Demnach schuff der meister daz all wyber vnd kynder yn sym garthen am schloß ligende . wurden vnder ett
- F206-046v,25 lichen schyrmten vß dicken balcken gemacht . beschyrmte . wann sollich geschutz allermeist gerichtet warde mitten yn die statt . Die mener mocht
- F206-046v,26 ten sich by tag wol verhuoten . aber by nacht flohen sie ynn huolen vnder die erd vnd vnder starck gewelb 7c . Eß was wol eyn zeychen gott allein zuo zuo schriben daz durch alles geschutz der turcken nye keyn mensch oder vych vmb kame vß genomen wenig menschen vnd vych vff die eyn huß viele durch die buchszen vmb geschossen . noch mee theten die turcken zwuo der grosten buchszen vff eyn hohen berg furen von welchem man yn die statt mag sehen damit sie on vnderlaß schossen yn die stat yn die besten gebuw vnd wo die menschen allermeist zuosamen kamen . Doch geschahe auch wennig schaden den menschen durch dieselben buchszen . vngezwyffelt durch gottes verhutung . durch furbittung der jungfrau Marie vnd sancti johannis baptiste zuo welchem alles volck eyn sundern zuofflucht hette mit stetem gebette tag vnd nacht . Da der turckesch hauptman sol
- F206-046v,27 lich grosse wyßheyt vnnd kluogheit deß obersten meisters zuo Rodiß so er dan yn disen sweren leuffen bruchet vnd erzeuget ward mercken vnder
- F206-046v,28 stund er ynen durch betrug zuo ertodten vnnd schicket ettlich zuo ym yn maß vnd gestalt als ob sie von dem turckem wychen vnd ym zuo vielen welche ynen solten vergifften . vnd ward ynen groß gelt darvmb ver
- F206-046v,29 heyssen mochten sie eß zuoweg bringen . Der erst vnder denselben als er yn die statt wolt gan . ward erforschet als all ander vnd ward yn synen reden wyderwertig erfunden vnd veriahe zuolettst den handel gantz auch warnet den obersten meister daz er sich wol verhuotet wan ym schwer vnd vil hynderlist oder vffsetzung weren bereyt . Also ward er ertodt . Dar nach kam syn gesell gyfft tragende der ward gar by erschossen ee er zuo der statt kam . wan man eß wol von ym wuoste deßhalb er schnell wyder hynder sich flohe . Nach dissem vnderstunden die turcken by nacht eyn bollwerck an dem stattgraben schnelliglichen vff zuo richten . Sobald dasselb vermerckt ward von denen ynn der statt . hielten sie radt das
- F206-046v,30 selb gebuw zuo zerstoren . vnnd wurden von stund an funffzyg starcker junger edellmenner vßerwelet . vnd ynen eyn strengester ritter eyn Jo
- F206-046v,31 hanser herr zuo geben zuo eym hauptman . welche by nacht vß brechende . heymlich vber den graben kamen vnd schnell leytern an das bollwerck an schluogen vnd styegen dar vff vnd erstachen der turcken zehen so dar
- F206-046v,32 vff waren . vnd wurffen das bollwerck nyder vnnd mitt sollichem syeg yleten sie wyder yn die statt mit freud vnd schall von dem hohen meister vnd den burgern eerlich empfangen vnd auch begabet . damit daz auch der andern gemuoten zuo sollichen thaten wurden gereytzet . Vber wenig tag hernach vnderstunden die turcken mitt grosserem vlyß die burck sancti Nicolai zuo gewynnen vnd all beschyrmung vnd bollwerck mitt buchszen ab schysen . doch was sie ytz ab schosen ward von stund an wyder vff gerichtet vnd gemacht . Darnach machten die turcken eyn huoltzene bruck die burg zuo stuormen . vnd was die bruck so breyt daz sehß zuo roß nebeneynander darvff mochten ryten vnnd so lang daz sie bede stadel mocht beruoren vonn sant Anthonius turn biß an den berg darvff die burg steet . Dieselb bruck vff dem land heymlich gemacht brachten die turcken mit grosser subtilikeyt vff das meer . Do das die cristen ersahen vnd nit eyn wenig erschracken . was eyn behender schiffman vnder ynen aller abenthuer vff dem meer wolkundig . derselb ließ sich yn das meer vnd vff loeset den ancker der die bruck hylte . vnd band die bruck gar lyß mitt seylen an die steyn also daß eß mitt kleynen macht mocht zerzerret werden . welche sach alsbald fur den hohen meister kam der demselben schiffman eyn besunder schenck vnd reuerentz thet vnd mit freuden ynen wyder an syn stacion sendet . Da die turcken das ynnen wurden vnder
- F206-046v,33 stunden sie die bruck an das land zyeihen vnnd ordnetten von stund an dryssig grosser galeen wolversehen vnd gezyeret mitsampt vil andern schyffen mit geschutz vnd buchszensteynen beladen vff das daz ob sie die burg mit sturmen gewunen . vnd sieg behielten . den port . die turn vnnd statmuern von stund an mochten beschysen . Also viengen sie an zuo sturmen vnd schickten ettlich vßerwelet starck turcken yn kleynen renn

F206-046v,34 schyfflyn an sant Niclas berg die den sturm solten an vahn . welchen alsbald das ander heer vß den galeen vnnd von der brucken solt nach tretten als auch geschahe . Als der oberst meister disses vermercket . ließ er die burg vnd den berg ye baß vnd baß bewaren mit volckprouand vnd bollwercken . vnnd besunder eyne graben durch die velsen vmb die burg vnd berg machen daran mee dan tusent man tag vnnd nacht erbeyten keyn kosten an gesehen . vnd sittenmall die turcken die statt zuo eymmal an zweyen enden wolten vndersteen zuo besturmen die burger ynwen

F206-046v,35 dig dadurch voneynander zuo teylen vff das sie dester baß vnnd lichter yrem anschlag mit der burg mochten nach kommen . bestellet der oberst meister vff der judenmuer vnd auch an der welschen stacion . welche von den turcken eyne groß teyl ab geschossen waren . eyne teyl der burger vnd soldner . doch mit sollichem geding vnnd bescheyd daz sie on syn sunder

F206-046v,36 geheyß nit solten von denselben orthen ab tretten oder wychen . Aber wan alles heyl der cristen bestund yn beschyrmung deß turns oder burg sancti Nicolai . ward aller vlyß vnd macht darzuo gebruchet vnnd gewendet denselben zuo behalten . Demnach all latynschen krichschen vnd rodisser herrn vnd burger sich bereyten eynhelliglichen vnd kecklichen denselben zuo behalten . vnnd den turcken wyderstand zuo thuon ob sie auch all dar

F206-046v,37 vmb solten sterben . Dazuomal wurden zwen soldner vff dem turn be

F206-047r,01 griffen . welche yre weer ynn das meer hetten geworffen vnd wolten zuo den turcken flyehen . die wurden von stund an ethaubtet . // Also am . xx . tag deß monedts Julij viengen die turcken an den berg vnd burg sancti Nicolai zuo sturmen doch also daz sie by nacht zuo land vnd meer hyn zuo ruckten so heimlich sie mochten . Aber vor dem sturm machten sie eyne groß geschrey vnd gethoen mitt geruoff vnd buchsenge

F206-047r,02 schutz . vnnd die galeen mitsamt andern schiffen nehetten sich hyn zuo . auch die bruck ward wyder zuo gerustet . da die turcken mit grosser macht vnd zall den sturm an huoben zuo uolltruckten . die cristen schossen vß der burg vnder die turcken mit buchs vnd armbrosten so best sie vermoch

F206-047r,03 ten . durch welches geschutz dis bruck zerbrach vnd ertruncken der turcken gar vil . darzuo vier galeen mitsamt ettlichen schiffen mit buchs beladen

F206-047r,04 den durchschossen von den cristen giengen vnder zuo grund . vnd all die darynn waren ertruncken . Aber welche von den turcken vß den schiffen vnd von der brucken an das land waren kommen vnden an den berg . wurden erstochen vnd erschossen von den cristen also daz keyner darvon entran . Noch mee schossen die cristen fuer yn die turckeschen galeen . deß

F206-047r,05 glichen wydervmb die turcken auch theten . vnd was vff beden syten eyne grosser strydt mit grusenlichen vnnd mancherleyen geschutzen ynn der vynsternuß . vnd weret von mitternacht an biß yn die zehende stund deß nach uolgenden tags . da die turcken von den cristen wurden veriaget vnd vberwunden . Do hett man geschon dry gantzer tag gar vil corpell der turcken am stadel mit goldt silber vnd kostlichen kleydern getzye

F206-047r,06 ret ligen . vnd noch vil mee ym meer fliessen die von den cristen aller sol

F206-047r,07 licher kleynheyt wurden entblosset . wan yn dissem sturm gar vil edeler turcken vmb kamen . auch deß turckeschen keyzers allerliebsten frunde . vnder welchen eyner was demselben keyser seer nahe an gesybt . der am dritten tag am land gefunden ward vnden an dem berg von dem meer da hyn getryben . deßhalb der turck groß leyden enpfing . Yn disem sturm als hernach gefunden ward drythalb tusent turcken kamen vmb . dem

F206-047r,08 nach der turckesch haubtman so leydig ward daz er dry gantzer tag vn